

丙寅膏

丁卯春正月

上虞羅氏印

丙寅稿敘目

乙丑歲暮既編印庚申以後文字七十篇爲松翁近稿意欲遂
焚筆硯乃改歲以來人事乖迕益甚於前不得已仍流覽故籍
以遣歲時陶公詩所謂造夕思鷄鳴及晨願烏遷者若爲予詠
矣是歲兒子輩復裒集一年中所作文字及舊稿未刊者總得
九十首付諸手民請有以名之乃顏之曰丙寅稿嗟乎以垂暮
之年丁艱貞之會而浪擲居諸爲此無益知我罪我復奚卹耶
丁卯正月松翁記

唐張義潮補傳

唐折衝府考補遺

蒿里遺文目錄序

庚子褒卹錄校補序

讀易草堂文集序

敦煌寫本曹夫人讚跋

曹議金四疏跋

曹元深施舍疏跋

曹良才畫象記跋

曹仁貴仲秋狀跋

陳彥□等獻物牒跋

宋槧小字本白文八經跋

明子平遺集殘本跋

恒農專錄跋

攻吳王監跋

漢王□卿買地鉛券跋

樊利家買地券跋

房桃枝買地鉛券跋

朱書買地鉛券跋

劉伯平鎮墓券跋

晉壽升拓本跋

宋朱雀饒拓本跋

漢石經公羊傳殘石跋

黃腸石拓本跋

梁蕭敷墓誌跋

魏元景造石窟碑跋

徵士奚智墓誌跋

元弼墓誌跋

元德專誌跋

元侔墓誌跋

元廣墓誌跋

元彥墓誌跋

元騰墓誌跋

元秀墓誌跋

元平墓誌跋

元煥墓誌跋

于纂墓誌跋

元子永墓誌跋

元悛墓誌跋

元廐墓誌跋

元周安墓誌跋

元天穆墓誌跋

王僧男墓誌跋

貴華恭夫人墓誌跋

充華嬪盧氏墓誌跋

元夫人薛氏墓誌跋

吐谷渾璣墓誌跋

汝陽王元暉墓誌跋

齊高消墓誌跋

朱岱林墓誌跋

赫連子悅墓誌跋

新羅眞興王碑跋

隋蕭汎墓誌跋

唐姜謩墓誌跋

宇文士及碑跋

幽州都督牛秀碑跋

杜君綽碑跋

清河公主碑跋

程知節碑跋

周道務碑跋

房仁裕碑跋

姜遐碑跋

席秦墓誌跋

柳君墓誌跋

封秦墓誌跋

李基墓誌跋

楊君墓誌跋

格康仁墓誌跋

僞周王貞墓誌跋

泉獻誠墓誌跋

崔哲墓誌跋

崔君夫人源氏墓誌跋

泉岷墓誌跋

崔湛墓誌跋

吉渾墓誌跋

崔孝昌墓誌跋

崔泰之墓誌跋

盧虔神道碑跋

盧夫人墓誌跋

孫瑄墓誌跋

高麗大覺國師碑跋

元劉秉謙雙勾竹跋

孫獻畫鵝跋

謝樗仙憩石酌泉圖卷跋

林佳清水仙竹石跋

普荷上人畫跋

姜巢雲花卉跋

劉塞翁畫跋

素庵相國七十壽序

陸軍部協參領顧君傳

序目

丙寅稿

上虞 羅 振玉

補唐書張義潮傳

張義潮

五代史記吐蕃傳東都事略西蕃傳並作張義朝舊唐書宣宗懿宗紀唐書吐蕃傳資治通鑑並作張義潮考李氏再修功德記石本及敦煌寫本亦作義潮大中五年賜沙州僧政洪壽勅及杜牧撰沙州專使吳安正等授官制通

鑑考異引補國史又作議潮殆本無定字也

沙州人

通鑑李氏再修功德記及張延綬傳並稱南陽張公舉其舊望五代史記載涼州留後孫超將拓拔承謙對唐明宗問孫超等世家稱張掖人張義朝云云是以義潮里貫為張

掖初唐分天下為十道河西隴右三十三州涼州最為大鎮開元

天寶中置八監牧馬三十萬其西復置安西都護府羈縻西番三

十國軍鎮監務大小三百餘戍守之兵皆取涼州節度及安祿山

犯闕肅宗在靈武盡招西河戍卒收復兩京吐蕃乘虛涼隴諸州

次第陷沒

五代史吐蕃傳

惟沙州至大歷中尚為唐固守吐蕃贊普徙帳南

山攻之急刺史周鼎請救於回鶻逾年兵不至議焚城郭引眾東

奔眾不可知兵馬使閻朝縊鼎殺之自領州事城守八年出綾一

端募麥一斗又二歲糧械皆竭始以城降自攻城至是凡十一年

州人皆胡服臣虜每歲時祀父祖衣中國之服號慟而藏之

唐書吐蕃傳案吐

蕃傳不明記周鼎守沙州之年而敘於元和十四年吐蕃寇隴州之後穆宗即位之前若鼎之城守在元和之初閭朝之降在元和之末者考隴西李府君修功德碑記立于大歷十一年中有時節度觀察處置使開府儀同三司御史大夫蔡國公周公云云是鼎

守沙州在大歷中之證又據顏魯公宋廣平碑側記云公第八子衡因謫居沙州參佐戎幕河隴失守介于吐蕃以功累拜工部郎中兼御史河西節度行軍司馬與節度周鼎保守敦煌僅十餘歲遂有中丞常侍之拜恩命未達而北蕃圍城兵盡矢窮為賊所

陷吐蕃素聞太尉名德遂贈以駝馬送還大歷十二年十一月以二百騎盡室護歸云云碑言城陷與吐蕃傳不合當以史所記為得實而鼎之亡必在十二年後則可信也由是年下數至八年乃貞元年茲據李記宋碑補其年月並正吐蕃傳之疏誤西域水

道記謂沙州以建中二年陷更不知何據義潮雖生長虜中而心繫本朝陰結豪俊謀歸唐苦未

有當逮會昌二年吐蕃贊普死無子立妃絀兄尙延力子乞離胡

國人以爲不當立多叛去國內大亂別將尙恐熱亦叛自號宰相

與鄯州節度使尙婢婢搆兵連年不決大中四年恐熱大略鄯廓

瓜肅伊西等州所過捕戮積尸狼藉麾下內怨皆欲圖之

唐書吐蕃傳及通鑑

義潮乘隙一旦率衆擐甲諫州門漢人皆助之虜守者驚走遂攝州

事繕甲兵耕且戰悉復餘州以部校十輩皆操挺內表其中東北

走天德城因防禦使周不請命於朝

唐書吐蕃傳

五年正月壬戌表聞八

月義潮復遣兄義潭

案義潮之兄名據太平寰宇記及冊府元龜卷九百七十七作義潭法國伯希和氏記所得敦煌書目有張議潭子某墓誌又作議潭實錄舊紀通鑑均作義潭又舊紀通鑑均稱

義潭為義潮兄而實錄則稱道弟義澤予藏敦煌石室本春秋後國語背記書七言彈詞記述義潮功德有家兄親事入長安龍顏對面極情歡語殆指義潭入朝事是義潭實為義潮兄而非弟也州人李明達李

明振押衙吳安正等二十九人入朝告捷並獻瓜沙伊肅鄯甘河

西蘭岷廓十一州圖籍帝嘉其忠命使者齎詔收慰擢義潮沙州

防慰使拜明達河西節度衙推兼監察御史明振涼州司馬檢校

國子祭酒御史中丞吳安正等亦授官武衛有差十一月詔於沙

州置歸義軍領沙甘瓜肅鄯伊西河蘭岷廓十一州以義潮為節

度管內觀察處置押蕃落營田支度等使金紫光祿大夫檢校吏

部尚書兼金吾衛大將軍特進食邑二千戶實封三百戶

兼探兩唐書本紀唐書吐蕃傳

方鎮表通鑑吳安正等二十九人授官勅李氏再脩功德記案通鑑考異載義潮歸附及獻地拜歸義軍節度月日諸書頗異茲書正月表請從實錄及通鑑八月獻地從唐年補錄及舊史本紀十一月拜歸義軍節度從實錄舊紀及通鑑又考大中五年賜

書勅有賜議潮勅書處分想當知悉語此為正月表請之確證又通鑑考異引天德軍奏沙州刺史張義潮安景身及部落使閻英達等差使上表安闔二人名不見他書闕為部落使當是闔朝後人據新史吐蕃傳沙州陷後慮朝有異志毒殺之則英達者固

忠臣後也惜無他事可考安則不著其職附記俟考 又李明德明振獻捷及拜職事均見李氏再脩功德記 又案諸書均記義潮本官不及勳散茲據李氏再脩功德記及太平寰宇記補之又沙州釋門索法律寇銘稱次子押衙忠韻助收六郡毗贊司空又

春秋後國語背記我司空兮敘沙塞意氣雄今是天配是義潮兼司空也 賜洪習勅有入朝使沙州釋門義學部法師悟真等名勅中又云或傾向天朝已分其覺路或奉使魏闕頓出其迷津是河西歸義沙門亦與有勞焉其遣使殆與義潮同在正月故賜勅

在五月也又杜牧撰敦煌僧正慧苑除臨壇大德制有遂使悍戾者好空惡殺義勇者徇國忘家 尋拜議潭沙州 裨助至多品地宜峻語蓋亦歸義時有功沙門之一撰華嚴音義者即此人也附著之以彰忠義

刺史 敦煌張氏勳德記皇考諱議潭前沙州刺史金紫光祿大夫檢校鴻臚大卿守左散騎常侍賜紫金魚袋入陪龍鼎出將虎牙武定文經語昭清史推夷齊之讓戀荆樹之榮手足相扶同營開闢先身入質表為國之輸忠葵心向陽俾上帝之

誠信一人稱慶五老呈祥寵寄殊功榮班上列加授左金吾衛大將軍每參鳳駕接對龍輿毬樂御場馬上奏策兼陪內宴召入蓬萊如斯覆燾今昔罕有仍賜庄宅寶器金銀錦綵瓊珍頗著其數功成身退否泰有時鳥集昏巢哀鳴夜切春秋七十有四壽終于

京永嘉坊之私第詔贈工部尚書夫人鉅鹿郡君索氏晉司徒靖十七代孫連鍾歸觀承雨露於九天鴻澤湧流占京華之一媛於戲晡西萱草巨壑淪悲異畝嘉禾傷歧碎穗勅耐葬於月登閣北塋之禮也是議潭入觀即留長安賜第考終但勳德記不載卒之

年月不可考矣又議潭刺沙州不知在何年姑繫於此 **懿宗咸通二年義潮自將蕃漢兵七千人復涼州**

遣使入告 據唐書吐蕃傳及通鑑但通鑑繫此事於四年三月以方鎮表三年置涼州節度考之似新傳為得 **明年置涼州節度領涼洮西**

鄯河臨六州 唐書方鎮表 **發鄯州兵二千五百人戍之** 五代史記吐蕃傳 案據方鎮表咸通三年以河鄯西三州隸涼州節度

但李氏再修功德記記張淮深張淮二人名其結銜雖多殘泐而淮深名上尚存伊西等州節度使兼司徒等字准名上存沙瓜伊西河節度使字似西河等州在咸通末年尚未析隸涼州又新史但言設涼州節度不言何人領之五代史記吐蕃傳記拓

拔承謙對唐明宗言謂吐蕃陷涼州張掖人張義潮募兵擊走吐蕃因以義潮為節度似即以義潮領涼州又李氏再修功德記稱義潮為河西隴右一十一州節度張延綬別傳稱延綬父作河西節度其撰文者亦署河西節度判官未見有稱歸義軍節度者

惟伯希和所得敦煌書目有歸義軍簿籍上有歸義軍印又索勳紀德碑題大唐河西道歸義軍節度使歸義軍之稱但見此耳然索碑仍冠以河西道意義潮初拜歸義軍節度及克涼州遂兼涼州節度尋仍用以前河西隴右兩節度之名合併為一使義潮任

之耳又李氏再修功德記稱李弘愿任沙州刺史兼節度副使歸義軍之設節度副使兩史紀傳及新史方鎮表均不載賴此記知之又疑當時或是河西隴右十一州節度治涼州復增節度副使以沙州刺史充之治沙州也 七年七

月遣使貢方物舊史懿宗紀 十月奏差回鶻首領僕固俊與尙恐熱大戰

擒斬之傳首京師新史吐蕃回鶻兩傳繫此事於僕固俊不言為義潮所遣今據唐會要舊史本紀改正蓋回鶻自喪破後初依吐蕃居甘州至義潮節度十一州乃隸義潮也又僕固俊通鑑作固俊通鑑又

記斬恐熱者為鄯州押領拓拔懷光與新史異 其餘衆奔秦州尙延心破之奏遷於嶺南吐蕃遂衰

絕通鑑 於是河隴肅清朝廷無復西顧之憂義潮乃請覲明年二月

入朝詔拜右神武統軍賜田宅於京師命從子淮深代守歸義張氏勳德

記太保咸通八年歸闕之日河西軍務封章陳欸總委姪男淮深令守藩垣 十二年八月義潮卒新史吐蕃傳及通鑑案新史及通鑑但記義潮入朝不記其返鎮考李氏再修功德記云先君歸

覲不得同赴於京華外族流連各分飛於南北沙州釋門索法律窟銘云小子押衙忠信奉元戎而歸闕臣子之禮無虧迴駕朔方被羈孤而日久願投桑梓未遂本情由斯觀之義潮入朝後遂不復返鎮又淮深通鑑及宋史沙州傳作惟深李氏再修功德記作

淮深與新史同又新史及通鑑均以淮深為義潮族子宋史沙州傳作從子法京敦煌書目有張議潭子張淮深墓碑則淮深為議潭子書目原注首尾缺殆父議潭之文尙未損耶宋史稱淮深為從子則議潭為義潮從兄通鑑謂是族子則議潭又似族兄今姑

從宋史 淮深曾為沙州刺史後守瓜州伯希和氏所得敦煌書目中有詔沙州刺史張淮深守瓜州殘勅 又案義潮之卒通鑑作咸通十三年八月新史吐蕃傳亦言十三年卒惟敘於命族子淮深代守歸義句下致使讀者不辨卒者為義潮為淮深徐星伯

先生西域水道記云唐書方鎮表言張淮深咸通十三年卒今檢方鎮表無此文 於長安萬年陽宣坊之

私第詔贈太保諸史不記義潮飾終之典張氏勳德記稱贈太保又李氏再修功德記索勳碑等並稱義潮為太保與勳德記合 勅葬於素澹南原張氏勳德

記 淮深嗣為節度加左驍衛大將軍累加左散騎常侍兼御史大

夫兵部尚書

張氏勳德記公則故太保之貴姪也芝蘭異馥美徹聰聞詔令承父之任充沙州刺史左驍衛大將軍初日桃蹊三端繼政琴臺舊曲一調新聲嫡嗣延英承光累及峯修貴秩忠懇益彰加授御史中丞河西

復猶雜蕃渾言音不同羌龍嗚末雷威潛伏訓以華風威會馴良軌俗一 淮深卒弟淮嗣淮卒託

孤於義潮塔瓜州刺史索勳勳乃自為節度景福元年朝命許之

衆情憤激義潮第十四女涼州司馬李明振妻也出定其難率將

士誅勳請於朝以義潮孫嗣為節度使朝命使者內侍常

副使齊琪判官陳思回齎詔詣沙州慰問時明振已先卒詔以明

振長子弘愿充沙州刺史兼節度副使次子弘定充瓜州刺史墨

離軍押藩落等使第三子弘諫充甘州刺史以酬戡定之庸時乾

寧元年也

新史吐蕃傳謂義潮卒沙州以長史曹義金領州務予已於張延綬傳跋中糾正之矣通鑑於大中五年以義潮為歸義軍節度使時接書又以義潮判官曹義金為歸義軍長史於咸通十三年八月張義潮薨下又書沙

州長史曹義金代領軍府制以義金為歸義軍節度使與新史同又淮深以後事他書皆無考茲悉據李氏再修功德記又案淮深嗣位後以何年卒無考淮名下一字已泐張延綬傳記其父字祿伯不言其名殆即淮也傳書其結銜為河西節度金紫

光祿大夫檢校尚書左僕射李記則作檢校部尚書兼御史大夫微不合淮深結銜李記則僅存兼司徒字他勳官不可知矣又李明振妻戡定沙州篡奪之亂碑用偶語不明記為何人索勳紀德碑題河西道歸義軍節度索公記勳碑稱勳為張太保之子

增並稱上褒厥功特授昭武校尉持節瓜州諸□□□□□又云於時景福元祀白藏無射之末公特奉絲綸就加□□云云而李氏再修功德記立於乾寧元年以時考之則纂奪者即勳也李氏再修功德記稱賴太保神靈辜恩勳滅是勳當即夷滅其纂奪云一年間耳淮之嗣位歷年雖不可考以索勳纂奪在景福元年知卒在昭宗初年但不能確定為某年耳又肥言再整遺孫又僅義立姪男不知是否為義潮嫡孫亦不知為淮深抑淮之子要當是張延綬兄弟行李氏重修功德記淮名後有等州節度使兼御史大夫其上下文字均助當即其人也又案西域水道記謂索勳之嗣為節度使當在咸通十三年張淮深遷伊西等州節度之後考索碑明記景福元祀特奉絲綸而其前但稱勳為瓜州刺史是勳節度歸義確在景福元年非咸通十三年也至謂淮深以咸通十三年遷伊西等州節度尤不知所據咸通中除設涼州節度外不聞歸義軍諸州中又析出伊州涼州節度所隸諸州中又析出西州別立伊西節度也並附正之於此

陞無事者歷五朝垂六十年張氏世守之蓋終唐之世云張氏世守河西其世次可考者

止於乾寧中此後當仍是張氏宋史沙州傳謂至朱梁時張氏之後絕州人推長史曹義金為帥當得其實又五代史記吐蕃傳沙州梁開平中有節度使張奉自號白衣天子敦煌石室所出西漢金山國聖文神武帝與宋惠信勅其印文曰金山白衣王蓋即張奉或是義潮末孫苦無他證附識於此以待考

論曰唐得河隴經營之者數十年及羯胡倡亂朝廷不遑西顧委邊民如敝屣邊民顧效忠款沙州陷尤晚周閻死守於前義潮崛起於後率其忠義之民連年耕戰與蕃寇競卒復河隴提挈開天之舊疆而歸之天子百年左袵復為寇裳十郡遺黎悉出湯火邊塵既靖復遣子弟繼服事之忠而身歸闕廷殊勳介節冠冕人倫

宣宗置歸義軍以旌之子孫肺腑仍世簪紱訖唐祚告終海內鼎沸而西土終不倍貳義潮之詒謀遠矣新舊兩史不爲立傳僅於宣懿兩紀及吐蕃傳中箸其涯略復多乖迕天彰忠義石室之書晚出頗可考見事實爰折中群言探索隱蹟補成此傳嗚呼使予得與義潮並世者爲之執鞭所欣慕焉

此篇初附印張延綬傳後嗣有改訂刊入雪堂叢刻甲寅秋又改訂刊入永豐鄉人雜著頃東友羽田博士亭郵寄法京所藏張氏勳德記殘卷復加修補蓋至是凡三易稿矣松翁附記

唐折衝府考補遺

予往歲據唐石刻所載折衝府以補勞氏折衝府考壬子冬復加增補總補府五十一正唐誌羸譌四補勞注八十五而附以隋兵符廿有六近數年來復有增益而前書旣已印行不及增入爰補

錄如左

關內道

京兆府

左驍衛豐安今補

唐劉玄豹夫人高氏墓誌又改授左驍衛京兆府豐安府折衝

華州

右衛豐原唐志

唐劉玄豹夫人高氏墓誌秩滿授右衛華州豐原府折衝

鳳翔府

文城唐志

唐榆林郡都督府長史王承裕墓誌弱冠以軍功授扶風郡文

城府別將

望雲

敦煌陰氏世系殘卷業子庭蘊見任岐州望雲府別將案唐志
鳳翔府有望苑府望雲疑望苑之譌

邵吉

補注

陰氏世系幹子嗣瓌岐州邵吉府別將

隴州

左金吾衛源汧

陰氏世系希次子嗣瑗左金吾衛隴州源汧府左果毅都尉案
唐志有臨汧府不知卽源汧否源汧疑汧源之譌

涇州

右領軍衛純德

補注

唐右龍武軍將軍張德墓誌次任右領軍衛涇州純德府折衝

原州

安善唐志

陰氏世系超子忠諫原州安善府左果毅都尉

寧州

羅川今補

唐劉玄豹夫人高氏墓誌祖善寧州羅川府折衝

慶州

同川唐志

唐張德墓誌初任左驍衛慶州同川府左果毅

丹州

長松右領軍衛補注

唐張德墓誌有子三人長曰榮琮任左領軍衛咸寧郡長松府

左果毅

延州

左武衛延安 唐志

唐劉玄豹夫人高氏墓誌嗣子伯曰崇曜左武衛延安郡延安府折衝

河南道

河南府

右衛巖邑 補注

唐劉玄豹夫人高氏墓誌又改授右衛巖邑府折衝

左武衛伊陽 唐志

唐劉玄豹夫人高氏墓誌季曰崇峻左武衛河南府伊陽府別

將

洛汭補注

唐楊士達墓誌隨大業五年起家左宗衛大都督至七年轉任

洛汭府長史是此府乃承隋之舊

右屯衛伊川補注

唐劉玄豹夫人高氏墓誌轉右屯衛洛州伊川府果毅

左威衛洛泉唐志

唐張德墓誌小子榮崇任左威衛河南府洛泉府別將

河東道

土黨晉州

右驍衛安信唐志

唐劉玄豹夫人高氏墓誌叔曰崇暉右驍衛平陽郡安信府別

將

潞州

從善 今補

唐劉玄豹夫人高氏墓誌仲曰崇睦上黨郡從善府果毅

上黨 今補

唐衛州新鄉縣令王希晏墓誌父相潞州上黨府折衝

河北道

幽州

涿城 唐志

唐滎陽郡長史崔湛墓誌涿城府果毅祥業之子

山南道

夔州

東陽 補注

唐唐州別駕王元崇墓誌左□夔州東陽府左果毅

隴右道

秦州

成紀補注

陰氏世系次子思言秦州成紀府別將

涼州

洪池唐志

唐王承裕墓誌皇明威將軍武威郡洪池府果毅高之孫

左領軍衛麗水補注

陰氏世系祖子守忠行左領軍衛涼州麗水府折衝都尉

甘州

甘峻今補

陰氏世系次子仁梁甘州甘峻府左果毅都尉

西州

岸頭

補注

陰氏世系祖子守忠行西州岸頭府折衝

淮南道

揚州

新林

左武衛 唐志

唐張德墓誌次子榮芝任左武衛廣陵郡新林府別將

附隋兵府

三川

補注

唐陪戎副尉康武通墓誌父仁隨任左衛三川府鷹揚郎將

布政

左衛

唐渠州司倉楊基墓誌祖貴隨任左衛布政府鷹揚郎將

先賢

唐王君字昭仁墓誌隨仁壽元年授公幽州先賢府車騎將軍

蒿里遺文目錄序

予年十有六始治金石文字之學時旅居淮安地僻無從得石刻
墨本山左估人歲或一二至又限于物力不能備致割損衣食之
資歲不能辦萬錢得誌墓之文二三十本已怏然意足然此實爲
予收集墓誌之始嗣以表墓穹碑多名人巨製有裨史學歲不數
遇見卽購之年三十旅滬瀆人事之暇手自移錄爲蒿里遺文顧
聞見苦隘是時所得碑誌不逾五百四十備官京師廣爲蒐集遂
增至千餘宣統紀元始手錄碑文百餘篇並命胥移寫誌墓之文
親爲校讐值辛亥國變避地海東以從葬昭陵諸臣碑箸錄較精

密乃先付手民餘稿散佚海外索居取舊蓄墓誌分地重錄之逮
返國寓津沽數年間所得墨本倍于往昔隨錄隨刊然付手民者
什才六七而已乃於甲子季春先將篋中所儲編爲蒿里遺文目
錄類爲八目曰墓碑徵存曰墓誌徵存曰元魏宗室妃主誌存曰
海東冢墓文存曰甄誌徵存曰塔誌徵存曰地券徵存曰蒿里餘
載乃是年秋供職 內廷稿成什九手民輟業逮十月遭遇奇變
瀕死僅存乙丑返津寓荏苒逾歲始以今夏補完闕卷復將兩年
續得爲補遺一卷統得二千四百九十餘品於是此目乃潰于成
憶甲子之變日與鬼伯爲伍去死一間耳此身且置度外遑卹其
它此目竟不至終虧一篑亦云幸矣顧靜念平生歷更世變不能
有所樹立窮老箸書以遣時日媿孰甚焉而徒存此塊然之軀何
如早化稽山之土然頻歲以來鍵戶索居如在墟墓開編散帙日

對陳人此與馬獵既封松檟成列亦何以異薑齋所謂活埋不圖于吾生親之展卷綴辭爲之慨歎丙寅七月晦中學以大歎然

言又庚子褒卹錄校補序

辛酉長夏采訪辛亥殉國諸君子事實以勘定吳子修羅順馴兩提學之書欲兼採庚子國變死事之人合撰庚辛成仁錄而苦無一書記述庚子死事者一日老友章式之外部以庚子京師褒卹錄見贈爲之喜出望外此錄爲裕小彭部丞厚舊稿天津喬亦香太守保衡所編刻殺青甫竟者也爰盡一日之力讀之知我先聖先王之教澤固未嘗絕於天壤而深歎部丞與太守先後撰輯刊印其有功名教爲不細也錄中先列諭旨後列原奏而附以死事者之呈報頗秩然有條理顧傳寫刊刻不能無譌脫而以三日夕之力以諭旨與原呈互校而比勘其同異並函請朱聘三太史

汝珍

敬檢

德宗皇帝實錄恭校

諭旨以定從違復請金浚宣部

郎從亦香太守假部丞原稿比勘一過遂訂正百三十餘事成校
記一卷復查原稿尚有李文忠兩次請卹順直官紳兵民奏吉林
將軍兩次請卹吉林官紳兵民奏又順天府第一次請恩卹奏中
寧河縣死難之人此錄均芟削不載一諭旨及奏摺關於死事者
尚十餘通爲補遺一卷將請於太守補刊以成全書倘亦太守所
樂許乎

讀易草堂文集序

我國有醇儒曰辜鴻冥外部其早歲游學歐洲列邦博通別國方
言及其政學聲譽固已藉甚及返國則反而求之我六經子史爽
然曰道固在是無待旁求也於是沈酣寢饋其中學以大成然世
之稱君者顧在彼而不在此羣然誦之曰是固精於別國方言遂

於西學西政者也南皮張文襄公總制兩湖能養士招君置左右亦第稱之曰是精於別國方言邃於西學西政者也故客幕下久溫溫無所試及庚子都門亂作乘輿播遷國事危急君乃以歐文撰尊王篇歐人爭傳誦當時爲之紙貴外患以紓於是世乃稍稍知君儒術各省大吏爭相羅致矣然其所以重君者則仍在彼而不在此第以備外交緩急已耳光緒己亥予始識君時值甲午戰後海內士夫憤於積弱競言變法相遇輒抵掌論天下事汲汲如飲狂藥而君獨靜謐言必則古昔稱先王或爲諧語以諷當世子灑然異之庚子客鄂中則君設義塾日以儒先之言訓童穉益重君不同流俗然尙未深知君也及光宣間備官京師再相見於春明君憂世論之日岐乃陳時政得失請執政代奏文累五千言探索根元洞見癥結予受而讀之竊以爲賈長沙復生不能過是

蓋天下之至文沈疴之藥石曩者知君固未盡也而當道顧不之省第以君爲精於別國方言遂於西政西學其茫昧如初也君言既不用遂坐致陸沈予避地海東與君睽者垂十年及返國重相見則歐戰後矣世亂乃愈急君則年愈高遇愈窮而氣愈壯日以歐文倡導綱常大義以振愚蒙每一文出各國爭移譯於時歐人鑒於戰禍又習聞君言始恍然富強不足圖治而三千年之東方文化駸駸乃有西被之勢矣君之學曩不得申於宗邦者今且將行於世界知天之生君將以爲衛道之干城警世之木鐸其否泰通塞固不繫於一人一國已也今年春君以所作文徵序於予爲選尤雅者十四首分爲內外篇並弁語簡端俾讀此編者知君爲當世之醇儒君之文乃天下之至文沈疴之藥石非尋常學者可等類齊觀者也至君論事於二十年以前而一一驗之二十年後

有如蒼龜此孔子所謂百世可知益以見其學其識洞明無爽予之稱爲醇儒洵非誣也

敦煌寫本曹夫人讚跋

讚稱夫人卽前河西隴右一十一州節度使曹大王之夫人又有辭天公主囑託偏照於遺孤別男司空何世再逢於玉眷語亡友蔣伯斧學部補錄此文入沙州文錄考曹夫人當是曹元忠之妻云元忠以宋興國五年卒贈敦煌郡王授子延祿本軍節度前此義金元德未聞受此封爵而延祿之死在眞宗時此石室中無咸平後片紙又文中有別男司空之語延祿爲宗壽所害其男不得稱司空故知爲元忠妻無疑玉案此曹夫人殆義金之配非元忠也石室有曹議金疏四篇一署長興四年十月九日一署長興五年五月十四日均爲轉經設齋度僧施舍而作他二疏一署長興

五年正月廿三日一署長興五年二月九日皆爲施舍而作其署
銜均作河西歸義等軍節度使檢校令公大王是議金曾受王封
而史失之議金娶于闐李氏宋史稱李聖天自稱唐之宗屬廻鶻
尙唐公主稱天公主議金以聖天爲唐宗屬故遂沿此稱又議金
雖娶于闐李氏爲正妃其下尙有夫人曹議金四疏皆先祝聖主
謂唐天子次祝大王謂曹氏次祝天公主謂于闐李氏次祝夫人
謂羣媵次祝司空謂其世子次祝諸幼郎君及小娘子姊妹則祝
其諸子諸婦諸女也讚稱夫人廣平鼎族但舉郡望不能知其爲
何氏也別男司空語亦與議金疏合司空乃夫人所生故託孤於
天公主也至元忠妻乃封秦國夫人見續資治通鑑長編雖不知
其姓氏然非于闐李氏可知此夫人非元忠妻而爲議金夫人明
矣議金四疏往歲未得寓目近日本友人羽田博士亨傳錄刊入

敦煌叢書中故得據以訂正惜學部墓木已拱不獲同賞析矣

八
敦煌寫本曹議金四疏跋

此四疏曹氏署名作議者二作議金者亦二往歲作瓜沙曹氏年表以冊府元龜載曹義金名作曹義疑奪金字觀於此疏始知在當時稱名本無一定至史傳作義金此疏作議金則但取同音初亦無定字矣議金娶于闐李氏與于闐爲婚姻之國故四疏中祝辭首舉中國次及于闐第一疏言東朝奉使早拜天顏于闐使人往來無滯第二疏言朝貢專使來往不滯於關山于闐使人迴騎無虞而早達第三疏言朝廷奉使駟騎親宣于闐專人關山不滯知瓜沙之於于闐休戚相關至切又知瓜沙之於中國效忠甚至使命往來不因艱阻廢事大之禮且疏中黎民之民字缺筆作巨尙謹避唐諱尤足徵西陲民德之厚張義潮遺澤之長中土兵爭

數十年不已而西陲小康且百歲豈非有以致之哉

敦煌寫本曹元深施舍疏跋

此疏日本京都文科大学教授羽田博士亭據法京藏本刊入敦

煌叢書中疏後署天福七年十一月廿二日弟子歸義軍節度使檢校司徒兼御史大夫曹元深考元深嗣爲歸義軍節度使宋史沙州傳及文獻通考皆不載惟舊五代史晉少帝紀載之繫之天福八年正月然五代史記晉高祖紀及薛歐兩史吐蕃傳均稱天福七年十二月丙子沙州曹元深瓜州曹元忠皆遣使者附于闐使劉再昇以來似元深七年已嗣位往歲撰瓜沙曹氏年表疑不能決據此疏則七年十一月元深已稱歸義節度使則元深非以八年嗣位明矣薛史繫之八年殆元深以是年正月始奉朝命耳是年元深殆以檢校司徒兼御史大夫權攝節度次年眞除則加

檢校太傅矣

敦煌寫本曹良才畫象記跋

此記今藏法京圖書館亡友蔣伯斧學部曾編入沙州文錄記稱
公諱乙字良才卽今河西一十一州節度使曹大王之長兄矣公
乃是亳州鼎族因官停徹當是轍之譌字於龍沙譙郡高原任職已臨於西
府記其門閥也又云前住衙內師長位綰管內軍戎又云榮加五
州都將委任一道指揮則記其官也考曹義金疏結銜稱大王曹
元晟寫大般若波羅蜜多經後題亦稱曹元忠爲大王此記無紀
年不知所謂曹大王者爲義金抑元忠矣曩作瓜沙曹氏年表不
知曹氏里貫據此記乃由亳州因官而徙沙州者至譙郡則爲曹
氏郡望蓋出於漢丞相參故元忠曾封譙郡侯見金剛經後題記曹延祿曾封
譙郡王也記中文字多譌脫勳業相承承乃承之誤弓開滿月奪

月字無稱偏黨之音黨誤作儻奈何良材早折折誤作析子躡躡而無依子上有脫字下璧沈泉沈譌作沆其他脫誤尙多不遑僂計也

敦煌寫本曹仁貴仲秋狀跋

此狀稱仲秋漸涼伏維令公尊體起居萬福云云狀後署八月十五日權知歸義軍節度兵馬留後守沙州長史銀青光祿大夫檢校吏部尙書兼御史大夫上柱國曹仁貴狀上年月上鈐沙州節度使印但署月日而不著紀年故所稱令公不知爲何人瓜沙曹氏加中書令者二人一爲義金五代史唐明宗紀長興二年正月丙子以沙州節度使曹義金兼中書令一爲元忠宋建隆三年加兼中書令

見續通鑑長編文獻通考及宋史沙州傳

此不知爲義金抑元忠也法京藏曹義金及

曹仁深疏均鈐沙州節度使印據此狀知留後別無他印亦用節

度使印也

敦煌寫本陳彥

等獻物牒跋

曰

此牒署清泰四年丁酉歲五月日乃賀端午並呈節物者其前後並題左馬步都押衙銀青光祿大夫檢校左散騎常侍兼御史大夫上柱國羅右馬步都押衙銀青光祿大夫檢校右散騎常侍兼御史大夫上柱國陳彥下字半損羅之名全損考敦煌本晉河西司步軍都指揮使羅盈達墓誌稱故堂兄歸義軍管內衙前都押衙左散騎常侍兼御史大夫上柱國諱通達知此牒羅下所損二字爲通達也亡友蔣伯斧學部錄此牒於沙州文錄謂唐清泰無四年疑曹義金嘗受莊宗爵命故不奉石氏正朔案敦煌殘籍若僧龍訓等上司空牒二通均署清泰四年十一月蓋瓜沙僻處西陲去中國甚遠唐亡晉代邊氓逾年尙未之聞猶

曹議金四疏其署長興五年者三通一在正月一在二月一在五
月其實長興止於四年癸巳甲午正月爲閔帝應順元年四月以
後爲末帝清泰元年再改元而尙未通朝命故末由知之此牒稱
清泰而不知天福亦其例也又曹元忠刻大聖毗沙門天王象題
記署開運四年丁未七月是年實爲漢高祖之天福十二年又刻
金剛經後題記後署天福十五年己未五月是年實隱帝之乾祐
二年知西陲之與中土使命固屢阻矣

宋槧小字本白文八經跋

宋刊小字白文諸經不一刻近習見者爲秦刻祖本每葉闌上注
音者是也此本乃季滄葦舊藏闌上無音注每半葉二十行行二
七字存八經曰易曰書曰詩曰周禮曰禮記曰孝經曰論語曰孟
子彫刻至精海內言板本者以其僅見羣以爲北宋槧予檢宋世

避諱諸字至惇字止如書之臬陶謨禹貢武成禮記內則諸惇字皆闕末筆而孟子知皆擴而充之矣之擴字則否則此本刻於光宗紹熙時故高孝兩宗之諱亦均闕筆爲南宋槧殆無疑也因檢闕上注音之本則避諱亦至光宗爲止知爲同時所刻矣毗陵陶氏寫影精印流傳藝林以印本見贈批覽竟夕爰記其後以質世之言板本學者

明文淵閣舊藏子平遺集殘本跋

此書明代紅格寫本無書名及撰人姓名乃就六十年中生人排比年月日時一一推算其休咎匯而成集文字鄙拙書寫亦陋劣乃明文淵閣舊藏宣統初元內閣清釐大庫由學部奏請將閣中宋元槧書籍移交學部剏設京師圖書館予時備官學部見此本多至數百册此六册計丙寅年者三己亥己卯癸卯年者各一辛

亥燈節得之廠肆乃從閣中佚出者考明楊循吉吳中故語成化
癸卯之歲太監王敬以采辦藥材書籍至江南大肆厥惡時使士
子錄書以子平遺集要三學筆錄其多至千餘卷時方近秋試諸
生不往敬怒學官不得已率諸生往見于姑蘇驛敬坐堂上其副
曰王臣者立其傍欲笞學官諸生大呼其在門下者皆入詣敬罵
之部下軍校執杖擊諸生走出驛門市薪二束各執之反擊軍校
皆散走有鄭五者都下惡少亦王臣黨也被執至城下毆之幾死
明日告知府劉公瑀訪求罵者以所訪十七人及諸生皆引見乃
引罵者笞于皇華亭下各二十敬至闕下以事上下巡按推治巡
按張公准不肯承旨重繩諸生持兩可之說以待會王敬等事敗
得末減云云知此書乃子平遺集明成化中寫自江南者且因寫
此書激成事變明代采書不委之士夫而任之奄人其采及此等

鄙陋之作固其宜也以其關於此書故實且于此可考知其書名故附錄卷尾時丙寅仲春

恒農專錄跋

徒隸諸專予以光緒丁未見一二于京估叩其所出之地曰靈寶明年于兩江節署再見之問之購致此專之三河郝君亦云出靈寶故乙卯在海外摹勒其文字之佳者爲恒農冢墓遺文丁巳歲復錄其全專亦顏之曰恒錄專錄以爲此專信出靈寶矣及往歲游中州于洛有謝某者爲言專出孟津于汴遇山左估人宗某所言與謝同且云當日郝君奉端忠敏公購此專彼實爲之作合始悟往者出靈寶之說乃估人調語也往頗疑靈寶有何大役至動各郡邑之徒隸今知專出孟津則此等徒役皆興作陵邑者也漢制皇帝踐阼卽起陵邑東漢以後諸帝陵寢皆在洛陽此專中年

號凡六曰元和曰章和乃作章帝敬陵者曰永元乃作和帝慎陵者曰延平乃作殤帝康陵者曰建寧曰熹平則作靈帝文陵者也蓋自秦始皇帝治驪山陵役天下徒七十餘萬人漢仍沿秦之舊耳于是往者之疑爲之冰釋但此書既久刊行其名不可追改乃書卷末以正其誤以告世之讀是書者丙寅六月

攻吳王監拓本跋

此器出山西光緒山西通志已著錄其文曰攻吳王夫差擇厥吉金自作御監通志考攻吳卽句吳其說甚確惟未能考監爲何器案說文解字鑑大盆也廣雅甞鑑也字亦作覽玉篇覽大盆也其字从監从瓦與从金之鑑爲一字以金爲之則曰鑑以陶爲之則曰覽也莊子則陽同濫而浴釋文濫浴器也濫與鑑殆一字此器大可容人當是浴器非周禮凌人祭祀共冰監之監冰監以盛冰

置食物固不必如是之巨矣

漢王□卿買地鉛券跋

此卷廣約建初尺四分長尺一寸如古簡狀表裏文字各一行文曰建寧二年八月庚午朔廿五日甲午河內懷男子王□卿從河南街郵部男袁叔威買臯門亭部什三郤西袁田三畝畝賈錢三千一百并直九千三百錢即日畢時約者袁叔威沽酒各半即日丹書鐵券爲約凡八十一言文字極精案臯門亭見後漢書后紀靈帝宋皇后歸宋氏舊塋臯門亭章懷注詩云迺立臯門注云王之郭門曰臯門漢官儀曰十二門皆有亭云云是臯門亭部爲負郭地也郤卽陌之別構券上塗朱殆卽券文所謂丹書也平生見鉛地券眞品不下六七品而狀如古簡者僅是一品耳買

樊利家買地券跋

此券最晚出表裏刻字各兩行其文曰光和七年九月癸酉朔六日戊寅平陰男子樊利家從維陽男子杜壽子子弟□買石梁亭部桓千東比是佰北田五畝畝三千并直萬五千錢即日異田中根土著上至天下至黃皆□□行田南盡佰北東自比壽子西比羽林孟□若一旦田爲吏民秦胡所名有壽子自當解之時旁人杜子陵李季盛沽酒各半錢千無五十案漢人地券文皆略同惟多譌脫且語太簡質致不可通此券云桓千東比是佰北者謂桓阡之東比氏陌之北古是氏通用即日異者異乃畢之譌字卽孫成券之卽日畢房桃枝券省其文作卽畢謂卽日畢買田之事也田中根土著者孫成券作根生土著毛物皆屬孫成此省略致不可通上至天下至黃者乃上至青天下至黃泉之省文猶晉朱曼妻券之上極天下極泉也沽酒各半與孫成券同殆如後世買地

賣地者各出酬金矣房券省作沽各半建初玉地券作沽酒各二千義亦略同此券近歸金陵翁氏夏間游滬江得墨本爰記其後

房桃枝買地鉛券跋

此券十年前出洛陽予在海東時得之文三行其言曰中平五年三月壬午朔七日戊午雒陽大女房桃枝從同縣大女趙敬買廣德亭部羅西□步兵道東冢下餘地一畝直錢三千卽畢田中有伏尸男爲奴女爲婢田東西南比舊冢北比樊漢昌時旁人樊漢昌王阿順皆知卷約沽各半錢千無五十案此券文與孫成樊利家兩券略同錢字作𠄎樊利家券作𠄎五十二字合書二券亦相同錢千無五十者殆謂以九百五十爲千非足陌也隋書食貨志載梁世自破嶺以東八十爲百名曰東錢江郢已上七十爲百名曰西錢京師以九十爲百名曰長錢大同元年天子乃詔用足陌

內和
詔下而人不從錢陌益少至於末年遂以三十五爲百云前籍之
載錢陌自梁始觀於此券知東漢之世以九百五十爲陌足補載
籍之闕

券首稱三月壬午朔七日戊午考長術是年三月朔值壬午與券
合惟七日當得戊子券作戊午誤矣

朱書買地鉛券跋

漢人買地鉛券平生所見凡五品曰孫成曰房桃枝曰孟叔曰
樊利家曰王□卿然皆刻字此券爲溆陽端文敏公舊藏表裏皆
朱書各四行約百餘言惜漫滅什九其僅可識者表面第一行辨
壬午朔三字次行辨步南比三字第三行辨樊漢昌三字第四行
僅一墓字可識裏面首行見入富利三字次行見命蚤死及生人
屬西長共九字第三行見土等汝自計半字一全字三第四行見

丹書二字其餘亦間有可辨識者而文義不屬房桃枝買地券亦有旁人樊漢昌語彼券亦有壬午朔字豈與房券同一朱書一刻字耶王□卿地券亦有丹書鐵券語然彼乃刻字而塗以朱此則實爲丹書但券則是鉛非鐵耳鉛券朱書者傳世僅此一品故購而藏之並記語于裝券之匣以示來者

傳世鉛券凡二類一爲地券一爲鎮墓文此券雖多漫滅然觀其存字殆表爲地券裏爲鎮墓文合二種而書之一券亦僅見此一品耳

劉伯平鎮墓券跋

東漢末葉死者每用鎮墓文乃方術家言皆有天帝及如律令字以朱墨書于陶甑者爲多亦有石刻者猶唐人之女青文也其刻之鉛券者此券之外予尙藏一斷簡驗其文字與地券不同殆墓

中並藏兩券也此券上下兩端皆有斷缺表裏文字共四行其文

曰^{缺上}月乙亥朔廿二日丙申□天帝下令移前維東鄉東邸里劉

伯平薄命^{字闕數}醫藥不能治歲月重復^之與同時魅鬼尸注皆歸墓

父大山君召^{字闕數}相念苦勿相思生屬長安死屬大山死生異處不

得相妨須河水清大山^{字闕數}六丁有天帝教如律令紀年已不可知

而義尙可曉其曰生屬長安死屬大山者予舊藏延熹陶甗有生

人屬西長安死人屬東太山予別藏斷簡亦有此語但脫死人屬

東之東字耳河水清大山□山下殆脫平字漢季崇尙道術於此

可見一斑米巫之禍蓋已兆於此矣

近於都市見一券表面文正中大字一行曰元嘉元年十月十一

日□□袁孝金冢下側書如律令三小字其裏有大字如符篆不

可識殆亦鎮墓物附記于此

晉壽升拓本跋

此升藏定海方氏以予齋所藏卮勺龍勺及漢洛陽銅勺與他無字二勺斟之其容量當彼二升又一升之半晉壽縣之名始於晉隸梁州梓潼郡乃今之四川保寧府然宋齊魏並沿晉壽之名此不知爲何代物以書體考之要在晉後隋前也隋書律歷志言開皇時以古斗三升爲一升大業初依復古斗今此升又當古斗二升又半升知升量之增不始於隋矣此升銘文曰晉壽次百七其曰次百七猶言第百七矣

宋朱雀鏡拓本跋

此溁陽端忠敏公故物陶齋吉金錄箸錄所謂晉泰始鐸者是也今案此器之形上有方鑿所以容柄中空無舌乃仰持擊之而不可俯振蓋是鏡而非鐸也其陽面正中文一行曰泰始八年閏月

十七日師作神故忠敏以爲晉物考長術晉之泰始八年無閏月
宋之泰始止於七年十二月以後卽改元泰豫然泰豫元年閏七
月則此所謂泰始八年卽宋之泰豫元年非晉之泰始也是年正
月已改元泰豫民間無不知之理然細觀此鐸柄上表裏均尙有
刻字表曰兒師裏曰不足與計語殊不可曉卽年月下師作神三
字亦無義可尋意此鐸爲邊裔所作故已改元六閱月而尙未之
知也然其製作則至精書法亦精健大類爨龍顏碑甚可愛玩劉
宋之世金石刻稀如景星鳳皇視晉器尤可寶矣以此器陰面刻
朱雀故正其名曰宋朱雀鐸丙寅仲冬旣歸吾齋遂手拓付裝並
書其後以正忠敏千慮之一失

漢熹平石經公羊春秋傳僖公成公殘石跋

漢熹平石經公羊春秋傳僖公成公殘石拓本合肥孔氏得之西

安僖公存字十行行存一字至九字不等有傳無經據洪氏隸釋所載公羊傳殘字及此石知每年之首冠以某年至每月則削而不書今就拓本存字以今本補之知每行當是七十三字惟第一行校今本多三字二行多一字五行多二字七行則校今本少至六十八字知與今本不同處甚多至存字中又將寡人之圖今本作又將圖寡人姚寬西溪叢語謂公羊當時無他本其文與今文無異然洪氏隸釋所載云以今本校之易四字省四字是確有異同此石至一行中相差六十八字全傳可知叢語之言殆不然矣且熹平石經每經皆有校記隸釋所載公羊傳有顏氏言三條尤可證姚氏當時公羊無他本之說全出臆度也隸釋所載公羊傳洪氏亦言有傳辭而無春秋經文近年洛陽新出春秋殘石知經與傳乃分刻故隋書經籍志載一字石經春秋經一卷一字石經

公羊傳九卷近洛陽所出有春秋經足爲隋志左證也 成公殘字八行行存二字半至九字在僖公殘字之陰以今本校之文字無異同就拓本存字補以今本知每行七十一字惟第三四行均七十字知此二行文中校今本多二字也僖公傳每行字七十三此則七十一知各石行字無一定矣第三行十年上空一格以點識之知每易一年必空一格僖公殘石第四行里克之里字上有●知每月文字蟬聯處于兩節中間作點識之而不空格也 洛陽漢魏石經屢經遷徙自東魏孝靜帝武定四年由洛移鄴周靜帝大象元年復由鄴移洛逮隋文帝開皇六年又載入長安故宋人箸錄熹平石經均出洛陽惟西溪叢語謂有公羊碑一段在長安蓋累次遷移未嘗盡徙故今日洛陽城南開陽門外漢太學故墟出土殘石有魯詩有春秋經有士禮有論語此拓本得自關中

則必出關中隋志載後魏之末齊神武執政自洛陽徙于鄴都行
至河陽值岸崩遂沒於水其得至鄴者不盈大半河陽故城在今
孟縣西南之河陽墅安得好古家更於彼求之當有所得今洛下
關中殘石既先後並出吾人益不能無得隴望蜀之思矣丙寅暮
春

黃腸石拓本跋

黃腸石拓本五十九紙年月已損者五他五十四石中署永建者
四十五陽嘉者三元嘉者二建寧者三熹平者一考晉書索綝傳
言漢天子卽位一年而爲陵後漢書光武紀建武二十六年春正
月初作壽陵注初作陵未有名故號壽陵蓋取久長之義也漢帝
自文以後皆預作陵今循舊制也史記景帝紀五年三月作陽陵
渭橋索隱景帝豫作壽陵也按趙系家趙肅侯十五年起壽陵後

代因之也三說頗有異同索綝之言不知所本光武紀注謂文以後皆預作陵殆謂文帝以後自景帝始而據史記趙世家則其例實自趙肅侯啓之也東漢既承此制則石上紀永建陽嘉者乃順帝憲陵物紀元嘉者桓帝宣陵物紀建寧熹平者靈帝文陵物也憲文二陵工最久憲陵始永建二年至陽嘉元年文陵由建寧五年至熹平五年而皆有更黃腸掾名殆工已成而省視有損壞者而更易之也予嘗聞洛賈某言曾入漢某陵中實已先被發且聞他陵亦然故寶物已盡但存殘石耳問何以知其已發曰盜掘者自壙之此方穴之既入必見他方已先有穴是其證也予案赤眉掘長安諸陵光武詔言霸陵獨完而卒被掘於晉建興中見晉書索綝傳至洛陽諸帝陵則憲陵以九月葬十二月卽被盜發見孝沖紀他陵則初平二年二月爲董卓所發見孝獻紀今證以洛賈所言則史家所紀誠不誣

矣

梁永陽昭王蕭敷墓誌跋

此誌宋拓明庫裝舊藏松江沈均初舍人後歸吳中潘文勤公丙寅夏見之吳君湖帆許誌爲徐勉奉勅撰稱公諱敷字仲達皇帝之次兄也解褐齊後軍長沙王行參軍武陵王始開戎號又行參冠軍征虜二府軍事入爲太子舍人俄遷太子洗馬又爲南海王友出補丹楊尹丞復入爲太子中舍人又出爲建威將軍隋郡內史進號寧朔將軍內史如故久之徵爲後軍廬陵王諮議參軍以齊建武四年八月六日薨春秋卅有七天監元年四月八日詔贈侍中司空永陽郡王食邑二千戶諡曰昭王子恭王伯游嗣恭王早世子隆嗣以梁書永陽嗣王伯游傳考之敘敷歷官與誌多相合惟行參冠軍征虜二府軍事遺冠軍府又不載爲南海王友二

職而已傳又不載卒之月日及年卅七又伯游早逝子隆嗣爵傳亦不及則賴誌知之也此誌爲人間孤本苦不得見者垂二十年一旦入目喜可知也爰記其可補史傳者於此吳君爲密齋中承嗣孫工書畫能傳其家學所藏尙有唐北宋拓本邕禪師塔銘與傳世宋人復刻本不同且存字甚多亦海內孤本後有成哲親王跋反以爲宋人復本而以宋復本爲原石蓋信蘇齋閣學之言而致誤也並附識之

魏營州刺史元景造石窟碑跋

此刻在義州往在海東於內藤湖南博士許見墨本返國後倩青縣姚貴昉大令攜氈墨往拓之人間始有傳本碑稱太和廿三年平東將軍營州刺史元景上爲皇帝造石窟一區檢魏書宗室傳不載景名不知爲何帝之後昭成子孫傳常山王遵曾孫壽興自

作墓誌銘曰洛陽男子姓元名景有道無時其年不永云云隋太僕卿元公墓誌書其名作昺知傳作景者乃避唐諱改書非名景也造石窟之元景別是一人官營州刺史職位已崇不知史家何以遺之惟魏孝文帝弔比干文碑陰題名有散騎常侍領司宗中大夫元景弔比干文刊於太和十八年景方任朝官越四年而外任營州刺史殆爲一人無疑也

徵士奚智墓誌跋

誌稱智始與大魏同先僕膾可汗之後裔中古遷移分領部衆遂因所居改爲達奚氏焉逮皇業徙嵩更新道制勅姓奚氏焉案魏書奚牧奚斤奚眷諸傳均不載奚氏得姓之由及其先世惟官氏志載安帝統國諸部有九十九姓至獻帝時七分國人使諸兄弟各攝領之乃分其姓七族之興自此始也獻帝以弟爲達奚氏序

紀獻帝考曰威皇帝諱僧誌所謂僕膾可汗卽僧也誌所敘先世與官氏志合而達奚因所居得姓則志所未及也誌又稱智爲大人莫弗烏洛頭之曾孫內行羽眞散騎常侍鎮西將軍雲中鎮大將內亦干之孫兗州治中衛將軍府長史步洛汗之子智子眞亦有墓誌與此誌同出土莫弗烏洛頭作烏籌內亦干作干步洛汗作翰代北人名蓋本其國語譯以漢字故往往不同誌稱頭

卽大莫弗烏洛頭之

省稱

年耆多策每蒙引議下關之謀時亦預焉記其勳績頗略眞誌

作國祚經始百務怠殷帷謀幄議每蒙引預故外撫黎庶內讚樞衡又嘗爲昭成皇帝尸位等公傅式擬王儀蒙賜雞人之官肅旅之衛較此誌爲詳此誌稱智爲恆州樊氏嶺山渾人眞誌作河陰中練里人殆至眞而移居河陰遂稱爲河陰人耶此誌如小碑之式與晉荀岳魏韓顯宗等誌同式乃植立壙中者知元魏時尙沿

用此式唐宋人雖亦間有之然僅千百中之一二而已

太尉府諮議參軍元弼墓誌跋

此誌最近出洛陽弼字扶皇高祖昭成皇帝曾祖根清河桓王祖突肆州刺史父喻秦雍二州刺史隴西定公弼起家荊州廣陽王中兵參軍還朝爲太子步兵校尉遷太尉府諮議參軍春秋卅七以太和廿三年九月廿九日薨考魏書宗室昭成子孫傳陳留王虔昭成子紇根之子虔兄顓蒲城侯子喻襲爵高宗卽位除秦州刺史進爵隴西公卒諡定公子琛襲爵誌載弼父喻之官位爵諡並與傳同是弼爲喻子傳失書也至誌稱喻父突肆州刺史傳則作顓蒲城侯名位皆殊殊不可解至紇根之名僅見陳留王傳而不載其爵位誌則名根爵則清河桓王是不但有爵且有諡可補史官之闕古刻之可貴也如此

常山王孫元德甄誌跋

此甄誌文四行中二行文曰昭成皇帝後常山王孫冗從僕射羽林監徧城太守元德銘前一行文曰永平二年十一月十一日後一行曰受戒師道由考魏書昭成子孫傳常山王遵孫德封河間公卒於鎮南將軍贈曹州刺史殆卽其人然甄不云河間公傳不言其官冗從僕射羽林監徧城太守殊不可解至受戒師道由一行尤不可曉元氏子孫誌石出土至多而甄則頗罕故特著之

太尉參軍事元侔墓誌跋

此誌有陰記先世諱字爵位及侔窆葬月日石豎立有坐與晉世諸誌同侔字伯宗爲昭成皇帝之後而其名不見於魏書宗室傳誌陰記六世祖昭成皇帝五世祖弟八皇子諱受久高祖右丞相常山王遵字勃兜曾祖侍中使持節征西大將軍都督河西諸軍

事常山康王諱素連祖平南將軍冀州刺史河澗簡公諱於德父
鎮遠將軍光州刺史諱惺字純陀考魏書宗室傳常山王遵昭成
子壽鳩之子壽鳩卽誌之受久蓋譯音無定字誌稱遵字勃兜故
元昭墓誌作曾祖兜傳稱遵子素元昭墓誌作祖連常山康王此
誌作素連知傳與昭誌乃各舉其名之一字也傳稱素子德封河
間公而不載其諡誌則作名於德諡曰簡傳稱德子惺卒于光州
刺史諡曰恭不及其字誌則載其字純陀足補史佚而誌乃不及
其諡又賴傳知之也傳載惺子疑而不及侔侔官止太尉府參軍
殆以位卑而遺之耶往歲得元昭誌以書常山王遵名作兜嗣王
素名作連爲異今得此誌幸得解斯惑矣

洛州刺史元廣墓誌跋

誌稱公諱廣字延伯烈祖道武皇帝之苗裔考使持節涼青梁夏

濟五州諸軍事濟州刺史牂柯侯之長子案魏書道武七王傳陽平王熙子比陵賜爵牂柯公卒子天琚襲高祖時征虜將軍青州刺史尋降公爲侯世祖時征虜將軍夏州刺史卒贈本將軍濟州刺史子延伯襲卒誌之牂柯侯乃天琚延伯卽廣傳以字爲名據誌乃知其名廣也傳不載廣歷仕及事實誌稱二九辟爲直後加員外郎昇朝襲爵轉襄威將軍春秋五十以熙平元年八月廿二日丙辰薨追贈寧遠將軍洛州刺史特著之以補傳文之闕略

樂陵王元彥墓誌跋

誌稱彥以熙平元年十一月十日窆於金陵又東豫州刺史元顯魏墓誌亦稱顯魏以孝昌元年十月廿六日葬於金陵考元魏時諸帝自昭成以下若道武若明元若太武若文成若獻文皆葬雲州之金陵其地在今山西太原祁縣東至孝文卜洛遂不復遠葬

雲州今此二誌固明明出洛陽而文乃云葬金陵殊不可曉豈本欲葬雲州而不果耶書以俟考

城門校尉元騰墓誌跋

元魏陵寢顯祖以前皆在雲州孝文卜洛乃自表灑西以爲山園之所魏書文明皇后傳卽長陵是也長陵附近爲王公陪葬之所此誌所謂窆

於長陵之東北皇宗之兆域蓋王公陪葬之地在長陵東與北證以傳世諸王公誌若元周安若元子直若元固若元壽妃若樂安王妃馮氏並稱葬長陵之東若元羽若元鑽遠並稱長陵之東岡若元詳若元勰若北海王妃李氏稱長陵之北山元侔誌稱長陵之北岡均其徵也長陵又稱西陵元演誌葬於西陵高祖孝文皇帝之兆域其見他誌者若元颺元略元文元遙元珽元弼元暉元引元昭若胡昭儀若陽平王妃李氏都昌侯夫人薛氏蘭夫人都

西和
云窆於西陵乃長陵亦稱西陵之證至陵之所在史但稱灋西元
廣誌稱芒阜之陽長陵之左元緒誌葬於洛陽城之西北祔塋於
高祖孝文陵之東是陵在芒山之陽洛城西北也顧亭林先生曰
知錄訂正宋乾德四年詔謂誤以西魏文帝爲魏孝文誤以富平
文帝之永陵爲孝文長陵其言至確而灋西之長陵其迹久湮今
就諸誌所載可知概略異日若中州游迹可通當往訪之士人似
不難確得其地也書此俟之

洛州刺史元秀墓誌跋

秀字士彥爲太武皇帝之後臨淮康王第二子而魏書宗室太武
五王傳不載其名誌稱曾祖侍中中軍大將軍參都坐事臨淮宣
王祖使持節侍中都督荆梁益雍四州諸軍事征西大將軍領護
羌戎校尉雍梁二州刺史臨淮懿王父持節督齊州諸軍事冠軍

將軍齊州刺史臨淮康王考太武五王傳載臨淮宣王譚歷官與誌合惟參都坐事傳作參都曹事譚子提襲爲梁州刺史以貪縱削除徙配北鎮後以預參遷都功追封長鄉侯世宗時贈雍州刺史諡曰懿誌稱提爲臨淮懿王殆世宗時復舊封而贈雍州刺史傳失書復舊封也傳稱提子昌世宗時封臨淮王未拜而薨贈齊州刺史諡曰康王追封濟南王誌則仍稱臨淮康王不可曉也秀以正光三年秋八月卒春秋三十三文中不書其歷官僅於誌題書假節督洛州諸軍事龍驤將軍洛州刺史殆爲卒後所追贈耶

白水太守元平墓誌跋

平字平國照成皇帝之後驃騎大將軍左丞相衛王溼之孫羽眞尙書冠軍將軍使持節吐京鎮大都將陵之次子考昭成子孫無衛王溼惟秦明王翰子儀於太祖時官左丞相進封衛王則溼卽

儀也顧傳不載儀曾拜驃騎大將軍而太祖紀載皇始二年五月甲寅以儀爲驃騎大將軍則誌與紀正合北魏諸王名字殆用國語而譯漢字故有塋儀之異歟傳稱儀有十五子而但載三人曰纂曰良曰幹而不及陵故平亦不及誌稱平以奉朝請轉青州安東府功曹參軍加宣威將軍白水太守帶小劍戍主足補史官之闕誌書昭成作照成丞相作承相古昭照丞承通用又誌中豁達大度之豁作豁則別字也塋卽泥別字文中茂浮榮典籍典上脫一字

廣川孝王元煥墓誌跋

誌稱煥字子昭獻文皇帝之曾孫趙郡靈王之次孫使持節散騎常侍都督相州諸軍事中軍將軍相州刺史之第二子永平元年宣武皇帝旨紹廣川哀王焉正光六年除寧朔將軍諫議大夫孝

昌元年秋七月甲辰朔四日丁未薨年二十一追贈龍驤將軍荊州刺史諡曰孝文末又載繼曾祖賀略汗侍中征北大將軍中都大官又加車騎大將軍廣川莊王祖諧散騎常侍武衛將軍東中郎將廣川剛王父靈遵冠軍將軍青州刺史廣川哀王考魏書文成五王傳廣川王名略誌作賀略汗殆本名如是作略者史家所省改也傳又不載侍中征北大將軍及車騎大將軍等官殆卒後追贈歟傳亦不載諧官散騎常侍東中郎將但云贈武衛將軍諡曰剛而已靈遵傳作靈道誌云諡哀王傳作悼王史氏於悼王卒後不載襲爵之人此誌可補史之闕文惜誌不載煥諸子煥卒後有無承襲不可知矣

恆州大中正于纂墓誌跋

洛陽于氏爲代北顯閥四世貴盛纂名則不見魏書誌稱纂字榮

業曾祖新安公尙書令祖太尉成景公父散騎纂釋褐爲祕書郎
尋轉符璽郎俄遷通直散騎常侍復除輔國將軍中散大夫復加
恆州大中正春秋三十有九孝昌二年五月廿八日卒追贈銀青
光祿大夫考魏書于栗磾傳載栗磾爵新安侯子洛拔襲官至尙
書令誌所謂曾祖新安公尙書令乃洛拔也誌所謂祖太尉成景
公者殆是洛拔長子烈傳稱洛拔六子曰烈曰敦曰果曰勁曰須
曰文仁惟烈贈太尉公但傳不載成景公之諡則又不可曉矣先
是于氏誌之出土者有富平伯于纂亦沒于孝昌中則同名而非
一人也

贈豫州刺史元子永墓誌跋

誌稱子永字長休祖太保齊郡順王父夙離固疾事絕簪纓叔父
河間王養君爲子考魏書文成五王傳齊郡王簡卒子祐襲又有

子琛出繼河間王不載他子近年洛陽出衛尉少卿元演墓誌爲
順王長子此云夙離固疾者雖不知其名是順王有四子矣河間
王若年十六未封而卒後以琛繼子永旣養以爲子而未以繼若
不知何也子永出身爲給事中以別將有功假冠軍將軍遷員外
散騎常侍武泰元年四月薨追贈鎮軍將軍豫州刺史子永仕履
之可考如是爰記之補文成五王傳之闕

太常少卿元悛墓誌跋

誌稱悛字士愉昭成皇帝七世孫年七歲召爲國子學生卽引入
侍書以建義元年四月十三日卒於河梁之南贈驩驤將軍太常
卿其年七月十二日丁卯窆文前記曾祖於德選部給事中靈西
將軍冀州刺史河間公祖暉字景襲使持節侍中都督中外諸軍
事司空文憲公領雍州刺史父逸字仲雋使持節散騎常侍都督

冀州諸軍事衛將軍冀州刺史考魏書宗室傳昭成子孫常山王
遵之孫忠弟德封河間公卒於鎮南將軍贈曹州刺史其名作德
元侔墓誌則作於德與此誌合惟敘其歷官作平南將軍不作寧
西與此誌小異傳又稱忠子暉字景襲世宗時官侍中卒贈都督
中外諸軍事司空諡文憲其歷官與此誌合惟誌稱暉爲德子北
史亦作德子與魏書不同金石錄載後魏贈司空元暉碑謂據碑
當從北史又忠子壽興傳有其從兄侍中暉深害其能因譖之於
帝語旣稱暉爲從兄則非忠之子明甚傳之忠子暉之忠確爲德
之譌殆無疑矣

瀛州刺史元廡墓誌跋

誌稱廡以建義元年四月十三日薨其年七月十八日窆於竟陵
之東考自孝文卜洛定瀍西爲長陵厥後宣武葬景陵孝明葬定

陵孝莊葬靜陵皆在洛無名竟陵者當時宗室王公多陪葬以長陵爲最盛其陪葬景陵者若元倪若元珩若元仙若金城郡君元華光若宮嬪司馬氏僅五人而已長陵當時亦稱西陵意者竟陵或卽景陵異稱抑或爲景陵之譌耶元氏諸帝陵在洛者多湮沒惟洛陽縣志載知縣龔崧林考得景陵在正北路上灑河村不審從葬景陵諸誌果得於此否異日當就土人一訪詢之

定州刺史元周安墓誌跋

誌稱周安爲恭宗景穆皇帝之孫侍中征西大將軍儀同三司汝陰靈王弟九子封浚儀縣公以建義元年遇害於河陰考魏書景穆十二王傳卷七上原書已佚後人以北史等補佚故汝陰王天賜一系僅載子逞逞子慶和逞弟汎及脩義脩義子均凡六人近年洛陽出土墓誌有逞子景和及脩義之弟固往歲撰魏書宗室

傳注據誌以補傳之缺今得此誌於汝陰諸子又增一人元魏宗室景穆子孫最繁衍出土墓誌亦最多十年以來凡二十二石合以此誌得二十三石矣

元天穆墓誌跋

此元魏宗室而導爾朱榮入洛行廢立戮諸王以傾國祚之元天穆墓誌也文累千言不知何人得幾許諛墓金竟指鴟獍爲鸞麟矣誌稱天穆爲太祖平文皇帝之後高梁神武王之玄孫領軍將軍松滋武侯之曾孫太子瞻事使持節左將軍肆州刺史襄陽景侯之孫使持節侍中驃騎大將軍司空文公都督雍州諸軍事雍州刺史之長子于其先世皆官而不名考魏書神元平文子孫傳高涼王孤平文皇帝第四子生斤孤孫度度生乙斤乙斤生長生長生生天穆誌之高梁神武王爲斤松滋侯爲度襄陽侯爲乙斤

司空爲長生也惟孤之爵史作高涼王魏東雍州有高涼郡別無
高梁則誌作梁者譌也史於孤傳不載受封高涼惟云昭成卽位
分國之半以與之孤子斤傳言斤失職懷怒構寔君爲逆死於長
安太祖時以孤勳高追封高涼王諡曰神武一若孤初無高涼之
封直至斤死後始追封者神武似爲孤諡據誌則所謂高梁神武
王乃斤也疑斤以罪削封後因孤勳乃令追襲高涼之封並予神
武之諡史家所記欠明晰耳至度之諡武乙斤之諡景長生之諡
文及三世贈官傳皆失書疑皆追贈於天穆貴後也誌稱王諱天
穆字天穆傳不及其字傳稱天穆善射故誌有彎弧四石矢貫七
札語至誌敘天穆仕履甚詳謂起家員外散騎侍郎除員外散騎
常侍嘗食典御領太尉掾山胡叛充西北道行臺除征虜將軍并
州刺史除聊城縣開國伯安北將軍假撫軍將軍兼尙書行臺孝

昌三年與天柱尅定京邑除太尉公爵上黨王食邑三千戶仍除侍中兼領軍將軍使持節驃騎大將軍京畿大都督與天柱討葛榮爲使持節都督東北道諸軍事大都督尅定河朔增邑通前三萬戶加尙書事除世襲并州刺史以討平邢杲遷位太宰加翼保鼓吹增邑通前七萬戶傳多略而不書且並其始封聊城伯亦失書惟孝莊紀永安二年七月甲戌以天穆爲太宰司徒公誌但書太宰而不及司徒耳誌稱永安三年九月二十五日春秋四十二暴薨于明光殿孝莊紀永安三年九月戊戌帝殺榮天穆于明光殿永安三年九月爲甲戌朔二十五日正值戊戌與誌合洛陽伽藍記亦言九月二十五日詐言產太子榮穆並入朝莊帝手刃榮於光明殿穆爲伏兵魯暹所殺紀述較詳惟明光殿誤作光明殿當據紀與誌正之也天穆平生頗有武功而不足蔽其凶德雖身

被誅夷而不能救宗社之覆亡人倫之禍於斯極矣然後世尙有
了無才略而援引凶渠以危宗祏且老死牖下刑不之及此其人
又下于天穆吾于天穆又何誅焉丙寅三月

女尙書王僧男墓誌跋

誌稱僧男瘞于終寧陵之北阿考魏書皇后傳孝文昭皇后高氏
先葬城西長陵東南陵制卑局因就起山陵號終寧陵置邑五百
家後肅宗詔遷靈櫬於長陵兆西北六十步是終寧陵初爲孝文
昭皇后陵寢及昭后移葬長陵遂以爲宮人葬地故品一王遺女
墓誌亦云瘞于終寧陵之北阿也

貴華恭夫人墓誌跋

夫人王氏名普賢爲王奐之孫王肅之女誌稱考昔鍾家恥投誠
象魏夫人痛臯魚之晚悟感風樹之莫因遂乘險就夷庶恬方寸

惟道冥昧仍罹極罰茹荼泣血哀深乎禮服闋乃降皇命爰登紫掖案北魏書王肅傳以父奐及兄弟並爲蕭墮所殺自建業來奔景明二年薨於壽春又云子紹肅前妻謝生也肅臨薨始攜二女及紹至壽春世宗納其女爲夫人與誌正合又后妃傳不載貴華之稱可補史文之闕至文中惟道冥昧惟下殆奪天字

充華嬪盧氏墓誌跋

誌稱嬪諱令媛范陽涿人年甫九齡召充椒掖卒年十二謚曰昭考魏書於妃嬪之制記之不詳后妃傳但載高祖改定內官左右昭儀位視大司馬三夫人視三公三嬪視三卿六嬪視六卿世婦視中大夫御女視元士而無充華之名此稱充華嬪不知在三嬪抑在六嬪中也而年甫九齡卽入椒掖亦一奇矣誌載嬪先世曾祖度世官鎮遠將軍濟州刺史傳則作齊州北魏有齊郡無齊州

然隋書地理志齊郡舊曰齊州疑魏世曾稱齊郡爲齊州誌與傳不知孰爲得也誌又載祖淵夫人李氏父孝伯官平西將軍秦州刺史而傳作秦州魏有秦州無秦州則傳是而誌誤矣丙寅六月五日

都昌侯元公夫人薛氏墓誌跋

誌稱夫人適恭宗景穆皇帝之曾孫司徒獻武中山王之子而不載其名又云夫氏作牧秦蕃秉忠貞之概逢淫刑肆毒考魏書宗室傳景穆皇帝子南安王楨生中山獻武王英英五子曰攸攸弟熙熙弟誘誘弟略略弟纂熙與纂及子景獻仲獻叔獻並以討元乂遇害誘爲南秦州刺史亦爲乂斬于歧州夫人所適蓋卽誘也洛陽近出熙誌稱熙之死在正光元年八月廿四日誘之遇害不知在何時誌稱夫人薨於正光二年四月廿四日當在誘遇害未

久傳稱誘妻子得不坐然覆巢之下豈有完卵故夫人未久卽逝
但得免刑戮耳傳稱誘進贈車騎大將軍雍州刺史後贈儀同三
司進封都昌縣開國伯食邑八百戶謚曰恭此誌題作使持節儀
同三司車騎大將軍秦雍二州刺史與傳合而誌稱都昌侯則與
傳異也此誌文字稍拙別構之字獨作獨時作皆蕃作蕃則他誌
所未見也丙寅三月

汝山侯吐谷渾璣墓誌跋

此誌近出洛陽璣字龍寶其先吐谷渾國主柴之曾孫祖頭頽率
衆歸朝蒙賜公爵父豐承襲璣年廿襲父爵宣武時授奉車都尉
直寢侯如故春秋三十有七熙平元年六月二十日薨于京師考
魏書吐谷渾傳吐谷渾王無名柴者但有阿豺當卽柴蓋譯音無
定字也頭頽及豐傳皆不及前數年洛中又有武昌王妃吐谷渾

氏墓誌出土稱妃爲吐谷渾主胄胤安西將軍永安王斤之孫安
北將軍永安王仁之長女妃之祖父殆亦歸化魏室與頭頽同亦
不見魏書中足補史氏闕文誌稱瓌博暢羣籍又云善文藝愛琴
書知當日塞種入中原無不慕華風者誌稱頭頽歸魏賜公爵子
豐孫璣襲然誌題書汝山侯意先封汝山公後降爲侯誌言之未
詳也丙寅六月得墨本爰書其後

汝陽王元暉墓誌跋

本無何謂汝山侯蓋亦入

誌稱王諱暉字子冲恭宗景穆皇帝之玄孫儀同京兆康王之曾
孫祖使持節征南大將軍雍汾二州刺史西河王父使持節侍中
太師錄尚書事都督定冀瀛殷四州諸軍事定州刺史汝南文獻
王考魏書景穆十二王傳京兆王子推薨子太興襲後改封西河
子暹字叔照封汝南王薨子冲襲無子國除誌所稱京兆康王卽

子推惟子推傳不載諡康而近年出土元悰元襲元遙諸誌均稱
爲康王與此誌同傳於西河王太興不載其爲征南大將軍雍汾
二州刺史於汝南王暹不載其諡文獻均藉誌知之至暹子子冲
傳作子冲脫子字一若單名冲者據誌則名暉而子冲乃其字也
傳於子冲仕履事迹一字不載據誌則襲爵除散騎侍郎春秋卅
以武定三年閏月廿日卒殆本無可稱述也此誌出土後未久卽
歸粵中鄧氏近歸吳興張氏此尙是石在中州時初拓歲暮展觀
漫書其後

齊襄城王高湑墓誌跋

此誌以丙寅秋出磁州書法方整類魏元寶建墓誌北齊書宗室
傳襄城景王清神武第八子也弱冠有器望元象中封章武郡公
天保初封襄城郡王二年春薨乾明元年二月贈假黃鉞太師太

尉錄尙書事敘洧事實甚略誌稱洧字修延初拜通直散騎侍郎加平西將軍封章武郡開國公邑二千戶久之轉驃騎大將軍開府儀同三司及大統有歸弓輅云錫封襄城郡王邑三千戶以天保二年三月二日薨於晉陽時年十六較傳爲詳至傳稱洧爲景王誌則謚景烈傳但稱贈黃鉞太師太尉錄尙書事誌則尙有都督定滄瀛幽靈朔懷建濟兗十州諸軍事定州刺史均可補正史氏文宣紀天保二年三月丙午襄城王洧薨汪氏曰楨長術輯要謂天保二年閏二月乙巳朔本紀作閏四月不合閏月旣爲乙巳朔則二日得丙午洧之薨似在閏二月而傳誌均稱三月惜誌於三月二日下不著干支無從斷定爲閏二月抑三月爲可憾耳洧以天保二年二月薨以乾明元年四月葬前後閱十年何其久耶

朱岱林墓誌跋

山左傳世誌石以朱岱林誌爲冠顧近年石已漫漶此爲乾隆時拓墨幾不損一字據誌稱岱林曾祖霸祖法強父孝祖又云兄元旭弟叔業考魏書朱元旭傳祖霸眞君末南叛投劉義隆遂居青州之樂陵不言霸在魏歷官及投南後事實誌稱霸官使持節平州諸軍事安遠將軍平州刺史俗隣疆場布以威恩酌酒空陳夷金不受於後謗言及樂讒巧亂鄒條爾鷹揚翻然鵠起擁鄉里三千餘戶來逝河南值元嘉之亂朝多喪亂不獲其賞仍居青州之樂陵郡是霸在魏官至平州刺史以疑謗投南而亦未見用于宋足補元旭傳之略元旭傳但載祖霸而不及父此誌以元旭爲岱林兄則元旭于霸爲曾孫非孫也元旭蓋亦祖法強父孝祖傳失書也元旭字君昇岱林字君山此亦昆季行之一證矣誌稱法強官至司徒府諮議參軍事亡贈鴻臚卿孝祖文時除滎陽令轉

北海太守蓋霸投南不用故其子孫仍仕魏如故也誌稱元旭出除南兗州刺史爲元旭傳所不載叔業官通直散騎常侍左光祿大夫亦未附見元旭傳岱林諸子誌但載第四子敬循而誌文則作於猶子敬範誌稱從父兄敬範史君伯第三子蓋于敬循言之則曰從父兄于岱林言之則爲從子矣元旭傳載子敬道此誌所謂史君伯第三子則敬範殆亦元旭之子敬道之弟歟

太常卿赫連子悅墓誌跋

子悅北齊書有傳敘其事實至略此誌則文纍千餘言然多藻飾之詞其詳於史者僅家世與歷官耳傳稱子悅爲勃勃之後不言其世次誌則謂高祖勃勃曾祖祖倫夏帝之第四子祖豆勿于父儀同三司幽恆二州刺史而不名則子悅爲勃勃玄孫也傳稱魏永安初以軍功爲濟州別駕誌作起家爲征南府長史加奉車都尉

尋除濟州城局參軍不作濟州別駕誌又稱漢帝取子房之年魏
后得奉孝之歲除征虜將軍西南道行臺郎中復徙東南道大行
臺右丞是年轉左丞軍還徙安東將軍定州長史高祖追還爲左
丞除開府長史尋兼吏部郎中仍轉林慮太守除京畿長史世宗
總行臺之任轉公爲右丞尋徙征西將軍臨漳令傳則但云及高
祖起義侯景爲刺史景本爾朱心腹子悅勸景起義景從之除林
慮守郡滿更徵爲臨漳令誌又稱與中書令邢子才梁州刺史魏
收議撰新令徙勃海太守轉陽州刺史尋徵爲將作大匠加車騎
大將軍除廷尉卿除南青州刺史還京除御史中丞仍徙五兵尙
書食臨道縣幹夏州大中正儀同三司又除鄭州刺史又除都官
尙書尋加開府仍行北豫州事徵還本司改食貝丘縣幹詔兼吏
部尙書武平二年除太常卿其年十月以本官除使持節侍中聘

周使傳則僅記入爲都官尙書後以本官兼吏部除太常卿而已
子悅以武平四年八月二十四日薨年七十二詔贈晉州刺史尙
書左僕射開府儀同三司傳亦不書此誌隸書豐偉雄厚爲六朝
人隸書之冠篆額亦精惜不知出誰氏手也

北史子悅傳略詳於北齊書載子悅天保中爲揚州刺史罷刺鄭
州加位開府歷行北豫州事與誌合惟揚州誌作陽州金石錄載
子悅清德頌亦作陽趙氏引地理志東魏于宜陽置陽州後周改
爲熊州則傳作揚者字之譌也

新羅眞興王碑跋

此碑乙卯夏見之東友今西學士龍許今西君言在高麗慶尙道
之昌寧文凡二十七行前十六行行二十六字惟第三行多一字
第十七八行低一格行二十五字第十九二十行低二格行二十

四字第二十一二行低三格行二十三字第二十三四行低四格
行二十二字第二十五六行低七格行十九字末行低八格其式
甚奇他碑未嘗有也書迹在好太王碑真興王巡狩兩碑之間文
首署辛巳年當陳文帝天嘉二年亦真興王時所立黃草嶺碑立
于戊子當陳光大二年後于此碑八年也前數行爲記事之文漫
泐不可讀後十餘行爲官屬題名顧人名多漫滅惟□等喙居七
夫之名獨完亦見于黃草嶺碑其人金氏有將略嘗與百濟合兵
取高句麗十郡真興王薨子金輪立以爲上大等委以軍國事蓋
真興王朝名臣也其官名有軍主有大等有沙尺干有及尺干有
大奈干有奈末有大舍考新羅官制每城有軍主東國史略智證
壬四年東國史鑑
作六年親立州郡縣以金異斯夫爲瑟羅州軍主東國通鑑
又記真興王十四年七月新羅取百濟東北鄙置新州以阿淦金

武力爲軍主是也東國通鑑新羅法興王以哲夫爲上大等總知

國事碑有上州行使大等殆上大等爲執政官之長大等爲州郡

之長歟其曰上州下州亦見東國通鑑卷五新羅眞平王三十三年

十月百濟圍攻椴岑城王命上州下州新州之兵救之據此碑則

眞興王時已有上州下州之稱其名爲何時所制定則不可知矣

州字作羽字之別構者蓋从三刀之轉變也北史新羅傳其官有

十七等一曰伊罰干次伊尺干次迎干次破彌干次大阿尺干次

阿尺干次乙吉干次沙咄干次及伏干次大奈摩干次奈摩次大

舍次小舍次吉土隋書作吉士次大烏次小烏次造位證以此碑其曰沙

咄干殆卽碑之沙尺干曰及伏干殆卽碑之及尺干曰大奈摩干

曰奈摩殆卽碑之大奈末與奈末東國通鑑又作大奈麻奈麻一見法興

王七年定百官公服制度一見眞平王二十四年其曰大舍則傳與碑正合也隋書新羅傳載新羅官

十七等與北史同惟諸干字皆作千今證之此刻則北史是而隋書譌矣新羅石刻舊傳真興王兩刻此石晚出前賢所未見爰不惜一日之力手釋其文并爲之攷證如此今西學士熟于三國史事異日當取以證之

北漢山碑記新羅官名亦有南川軍主有及干殆卽此碑之及尺干又黃草嶺碑有大等有及干有大舍有小舍有奈末並與此碑及史傳合又有大阿干殆卽北史及隋書之大阿尺干與並附著之

隋上黨郡司功書佐蕭汎墓誌跋

汎字德泉爲梁高祖武皇帝五世孫吳郡王岑之孫梁大將軍永脩侯隋新鄭縣令瑾之子仕至上黨郡司功書佐大業十一年七月卒春秋廿有九考唐書宰相世系表載子瓚球瑁三人而不及

瑾當據此補之

唐長道安公姜謩墓誌跋

此誌康熙丁酉出秦州清水縣州人楊祖清得之牧豎之手而瑩
兆不可蹤跡因爲卜地葬其誌而起冢立碣焉錄其文入方志誌
略稱公諱謩字孝忠曾祖園祖正魏南秦州刺史冠軍縣公父景
武康汝洮四州刺史開府梁岷二州總管賜姓宇文氏公起家左
侍上士隋文受禪授秦王右府司兵遷長史東閣祭酒除博州清
平縣令久之除并州晉陽縣長太上皇愍民橫流大庇交喪公投
袂麾下贊揚興運授正議大夫大將軍府功曹參軍尋授右光祿
大夫又進位左光祿大夫仍授委蒲津監度兵馬京城清定遷光
祿大夫轉相國府賓曹參軍以功封長道縣開國公食邑一千戶
爲隴州右道安撫大使俄還京授員外散騎常侍河東道招撫大

使拜持節秦州諸軍事秦州刺史轉隴州刺史突厥來寇授公左
七總管有詔返公入朝以貞觀元年八月六日薨於京師春秋七
十諡曰安公考舊唐書本傳不載謇字亦不及其曾祖但稱祖真
不作正父景周梁州總管不及岷州亦不載其賜姓宇文其歷官
亦但載大業末爲晉陽長大將軍府建引爲司功參軍平京城除
相國兵曹參軍新史作曹曹誌又作資曹疑傳寫誤封長道縣公薛舉寇秦隴詔於隴右安
撫還京拜員外散騎常侍及平薛仁杲拜謇秦州刺史尋轉隴州
刺史不及誌之詳傳載謇以貞觀元年卒與誌合而不及年月亦
賴誌補之至傳稱卒贈岷州都督則誌所無也此誌拓本既不傳
爰據甘肅通志所載爲記其略於此

宇文士及碑跋

此碑宋以來皆未箸錄往歲日本伯爵大谷氏光瑞游醴泉得拓本

於昭陵吾友內藤湖南博士虎定爲字文士及碑攝影以贈予始
得寓目碑尙完全然額字全不可辨碑文亦漫漶十之七八僅下
截數行存十餘字耳碑中公諱以下全泐士及名字已不可見第
四行有贈司空上柱國許恭公考兩書本傳均稱初諡恭改諡縱
此云恭公仍其初諡也兩傳並稱士及因平王世充竇建德以功
進爵鄂國公不言封許今碑作許豈先封鄂而後改許耶抑鄂爲
許之譌耶今碑字固明明作許無殘泐之迹也碑雖殘泐然以傳
校之其拜官均合傳稱士及大業中以父憂去職尋起爲鴻臚少
卿碑亦有十三年特詔□起拜鴻臚少卿語知士及之拜鴻臚少
卿在大業十三年傳稱太宗時由殿中監以疾出爲蒲州刺史碑
亦有貞觀二年授使持蒲州諸軍下語知士及刺蒲州在貞觀二
年傳又稱數歲入爲右衛大將軍碑亦有右衛大將軍字與傳正

合足徵確爲士及碑無疑傳稱士及卒於貞觀十六年碑文雖已
不見年月則此碑當立于貞觀中可知也唐會要諸書載陪葬諸
臣不及士及而傳則明言陪葬昭陵今此碑出九嶷山足爲唐書
之左證而補諸書之闕亦可喜也

幽州都督牛秀碑跋

此碑在昭陵陪葬諸臣碑中最晚出殘泐殊甚但存前半上截十
八行故事實絕不可見使碑題及諱秀字進達等字並泐不能知
爲誰氏之碑矣考兩唐書無秀傳惟唐書太宗紀貞觀十二年九
月辛亥闕水道行軍總管牛進達及吐蕃戰於松州敗之二十一
年三月戊子左武衛大將軍牛進達爲青邱道行軍大總管李世
勤爲遼東道行軍大總管率三總管兵以伐高麗七月乙未進達
克石城舊唐書高麗傳載長孫無忌率牛進達等精兵一萬一千

爲奇兵唐書高昌傳文泰稱疾不至乃拜侯君集爲交河道大總管左屯衛大將軍薛萬均薛孤吳仁副之契苾何力爲蔥山道副大總管武衛將軍牛進達爲行軍總管率突厥契苾騎數萬討之姜行本紀功碑側有交河道行軍總管左武衛將軍上柱國□城縣開國公牛進達領兵十五萬此均秀戰蹟之可考者均書其字而不名秀殆以字行者耶此碑題稱左驍衛大將軍幽州都督上柱國琅琊郡開國公爲秀最後歷官抑卒後所贈蓋不可知而姜行本碑書進達爵□城縣開國公則爲秀之初封則可知也秀三爲行軍總管平生勳蹟必有可觀而兩書均不爲立傳此碑文字亦僅什存二三秀抑何不幸至是耶碑不知立於何時其征遼在貞觀二十一年其卒雖不知後若干年要必立於高宗朝矣

杜君綽碑跋

昭陵陪葬諸臣碑舊拓皆僅拓半截至王蘭泉先生始以整紙足拓據以箸錄於金石萃編惟杜君綽碑上截漫漶太甚仍據半截本入錄予往歲箸昭陵碑錄他碑或校以十餘本惟此碑僅據予所藏何夢華拓本而校以吳縣蔣氏雙唐碑館本所見足拓僅此二本耳故碑末上截所著年月但見□□元□□□甲子及日景子建等字晚得此本氈墨較善乃知末行爲麟德元年歲次甲子正月己酉朔廿八日景子建十九字拓本先後同而精粗之別至於如此然則烏可不求善拓哉爰記紙尾以補曩錄闕文

清河公主碑跋

此碑上截全損泐但存下截每行廿餘字文頗不屬僅公主諱字尚存與唐書公主傳合至傳稱公主下嫁程懷亮薨麟德時陪葬昭陵懷亮知節子也終靈遠將軍考兩書程知節傳並云子處亮

尙清河公主不作懷亮程知節碑亦作貞觀七年封第二子處亮
爲東阿縣開國□不作懷亮公主傳殆誤也程知節碑東阿縣開
國□國下缺一字不知其爵爲何等此碑有授東阿縣開國公食
邑一千戶語知節碑所缺乃公字也兩書程知節傳均不載其
先世仕履知節碑有曾祖興祖哲而父名在闕處此碑述處亮先
世有使持節瀛州諸軍事瀛州刺史婁之孫語得知知節之父名
婁官瀛州刺史足補知節碑之闕文公主卒葬年月已泐但存二
十三日字公主傳作薨麟德時疑與程知節碑同時所立故二碑
並爲暢整書也

程知節碑跋

此碑曾著錄於金石錄目錄近二十年始出土許敬宗撰文暢整
書卽書清河長公主碑者碑文字甚清晰惜每行上下皆損數字

兩唐書均稱程知節原名讒金而不及其字據碑則字義貞碑稱曾祖興齊兗州別駕祖哲齊晉州司馬傳亦不及惜父之名在碑損處不可見矣碑敘知節歷官與舊史多合惟碑於拜官年月較傳爲詳耳傳稱子處默襲爵處亮以功臣子尙清河長公主授駙馬都尉左衛中郎將少子處弼官至右金吾將軍碑有子明威將軍桂州淮南府折衝處嗣則傳所不載又碑載貞觀七年封第二子處亮爲東阿縣開國□傳亦失載東阿之封均當據碑以補本傳之佚者也

周道務碑跋

此碑宋代諸家多不箸錄惟寶刻類編引田氏京兆金石錄載之云上元二年今石下載全泐但存次乙酉三月景□朔廿二日公主合葬云云考上元二年爲乙亥非乙酉乙酉乃垂拱元年是年

三月朔正是丙午是合葬在垂拱元年非上元二年也道務尙臨川長公主唐書公主傳臨川公主韋貴妃所生下嫁周道務公主工籀隸能屬文高宗立上孝德頌帝下詔褒荅永徽初進長公主恩賞卓異永淳初薨道務殿中大監譙郡公範之子初道務孺祿時以功臣子養宮中範卒還第毀瘠如成人復內之年十四乃得出歷營州都督檢校右驍衛將軍諡曰貞道務事實可知者僅此碑文殘泐轉據史得知涯略此誌向無傳拓乃十餘年前始出土者

房仁裕碑跋

此碑十餘年前出九嶷山而吳氏攔古錄已箸錄作顯慶二年今以墨本考之碑載其紀年但存粵以二年歲五字年號已不存而文內裴仁基之基字闕末筆又有皇運中興語則碑立在玄宗時

非高宗時明矣又此碑爲崔融撰其結銜雖已損泐然尙存清河縣開國子六字舊史融傳載融以神龍二年預修則天實錄成封清河縣子亦此石不立于顯慶之一證矣

姜遐碑跋

此碑稱遐以天授二年十月十日合葬于昭陵神跡鄉舊塋而無立碑年月碑中無武氏所造新字則非立于武氏時而文中稱長子銀青光祿大夫太常卿楚國公皎次子兵部侍郎晦考舊史姜暮傳柔遠子皎玄宗在藩邸見而悅之皎察玄宗有非常之度尤委心焉竇懷貞之亂玄宗將討之皎協贊謀議以功拜殿中監封楚國公尋遷太常卿監修國史弟晦又歷御史中丞吏部侍郎開元五年放歸田里遷晦爲宗正卿久之皎復起爲祕書監是開元三四年間皎爲太常卿晦任兵部侍郎

史作吏部疑兵部之譌

至四年晦卽遷宗

正卿是此碑立于遐未歸田里之時于時恩禮甚渥故有立碑之舉則立碑之時殆在開元三年矣碑稱遐字柔遠傳則逕作柔遠豈後以字行耶

建陵縣令席泰墓誌跋

誌稱君諱泰字義泉安定人周之後也虞以握文啓蕃偃以司籍命氏劇秦之政自北徂南避羽之名改籍爲席示不忘本易文而已漢初豪傑西遷遂爲關中望族又云曾祖固周侍中襄州總管安靖郡公祖雅隨大將軍宣州刺史父邛隨左親衛考元和姓纂席本姓籍晉大夫籍談之後也談十三代孫瓌避項羽名改爲席氏漢初徙關東豪族席氏後徙安定臨涇又曰衡四代孫固歸後魏湖州刺史靖安公元孫君懿唐侍御史又籍氏注晉文侯仇弟陽叔生伯鸞司晉籍爲籍氏元孫籍談代爲晉大夫古今姓氏書

辨證春秋時晉有籍偃籍秦皆爲晉大夫與誌所敘席氏得姓源
流均合惟周書席固傳稱固進爵靜安郡公姓纂作靖安誌作安
靖爲異未審孰爲得也固傳子世雅嗣誌作雅乃唐避太宗諱省
世字也傳不載世雅子據此誌則雅子鄆鄆之子泰也泰葬于永
徽五年而文中有龍淵字淵字竟不諱不可曉矣銘文中英賢接
武武字作賦增足旁乃別字之罕見者

同州朝邑縣令柳君墓誌跋

誌稱君諱尙善字若水高祖煥梁宣城太守寧朔將軍梁州刺史
中領軍侍中醴陵縣侯除太子詹事尙書左僕射雍州大中正贈
撫軍將軍謚穆侯曾祖暉梁雍州別駕除吏部郎御史中丞都官
尙書又除侍中祖願言梁國子祭酒隨晉王諮議中書侍郎祕書
監父約梁祕書郎襲封漢南公考梁書煥傳稱煥封曲江縣侯不

作醴陵尚書左僕射左作右誌所載煥歷官傳亦多失載隋書柳
詒傳云詒字願言父暉都官尚書而不及侍中新唐書宰相世系
表亦稱煥爲曲江穆侯殆本於梁書誌稱醴陵不知孰爲得也表
載願言子遜而不及約與尚善可據以補世系表之闕

湖州刺史封秦墓誌跋

秦字安壽勃海蓆人高祖回曾祖隆之祖子繡父德輿與唐書宰
相世系表合惟表稱德輿隋南田令誌作扶風南由令隋書地理
志南由隸雍州扶風郡表作田者譌也表稱德輿子安壽孫元景
據誌則秦字安壽表舉其字而遺其名秦子中牟令玄朗次子玄
景玄震玄節玄慶表則舉其一而遺其四矣

定州長史燉煌公李基墓誌跋

此誌光緒戊申定州出土文字極精誌蓋亦正書尤精健惜誌之

上截每行殘泐七八字幸其名基之基字尙可見耳誌稱基爲涼武昭王八葉孫高祖茂曾祖孚祖昭父嗣祐基仕於隋而入唐殆以屬籍得保其舊官者文頗綿麗而事實甚寡其卒在永徽中年七十八夫人崔氏卒於乾封二年六月葬於咸亨元年四月其可知者如是而已趙氏金石錄目曾箸錄越州長史李基碑張太素撰立于上元二年九月是基尙有墓碑宋代已出土矣

歧州司戶參軍楊君墓誌跋

此誌楊君名已泐字茂道曾祖紹周驃騎大將軍燕幽汾饒文成鄜登等八州諸軍事八州刺史涼州都督儻城信公祖達隨黃門中書二侍郎工部吏部二尚書納言遂寧郡公皇朝贈尚書左僕射父則卬州臨卬縣令襲遂寧公茂道仕至歧州司戶參軍考隋書觀王雄傳父納仕周歷八州刺史儻城縣公雄弟達仕周官至

儀同內史下大夫遂寧縣男高祖受禪拜給事黃門侍郎進爵爲子卒贈吏部尙書始安侯諡曰恭唐書宰相世系表作紹生士雄士雄弟達隋書作觀父納納乃紹字之譌紹周書有傳亦不作納士雄隋書本傳及周書紹傳並作雄以雄弟一名士貴一名達字士達例之殆名雄字士雄耶隋書達仕周爵遂寧男高祖受禪進爵爲子卒贈始安侯諡曰恭唐表作始安泰侯此誌作遂寧郡公與傳不合又稱父則襲封遂寧公似達未嘗改封者至達之諡傳作恭表作泰誌不之及不能定其孰是也誌稱紹贈涼州都督周書本傳及隋書雄傳均不之及世系表亦不載達子則當據誌補之也

洛州司戶參軍格康仁墓誌跋

康仁爲武氏朝宰相格輔元之父元和姓纂唐書宰相世系表並

作處仁誌作康似非處之別字也姓纂載格氏出自允格之後漢

御史格班裔孫明

世系表作顯與誌合姓纂乃避中宗諱

仕後魏官至青州刺史明曾孫處仁

處仁生希元輔元希元洛州司法輔元官尚書平章事梁縣男生

遵殿中御史世系表同殆卽依據姓纂也據誌則七葉祖班晉時

爲侍御史非漢也曾祖通祖顯父權諸書旣失書康仁之曾祖通

及父權而誤以處仁爲顯之曾孫誤之甚矣舊唐書格輔元傳

附岑文本

傳言伯父德仁隋剡丞與同郡人齊王文學王孝逸文林郎繁師

玄羅川郡戶曹靖君亮司隸從事鄭祖咸宣城縣長鄴師善王世

充中書舍人李行簡處士盧協等八人以辭學擅名當時號爲陳

留八俊新唐書作父處仁仕隋爲剡丞與同郡王孝逸等八人號

陳留八俊誌作同母兄弟德仁昔在隨朝譽聞四海時稱八俊君之

器識論者謂昆季齊名二陸斯在三張可嗣是名列八俊官剡丞

者乃德仁非康仁也誌以二陸三張方之蓋謂與德仁競爽新史非而舊史是也誌稱有子輔元朝請大夫守洛陽縣令上柱國梁縣開國男輔元傳不載封爵姓纂有之正與誌合惟姓纂載處仁子希元輔元誌則不載希元使希元果爲輔元母兄寧有書次子而舍元子之理意希仁爲處仁從兄或是德仁之子耶輔元雖相僞朝然以阻立武承嗣爲太子被殺其人固有可取所謂弑父與君亦不從者世系表於其世次多舛漏爰據誌改訂之如左

河南格氏世表
格氏出自金天氏裔子曰昧生允格其後以字爲氏至晉世裔孫班官侍御史遷東平相其後嗣由雁門徙河南

通

顯

權

德仁

希元

後魏參軍雁門郡守遂家焉

龍驤將軍雲中郡守從孝文入洛授青州刺史

齊殿內將軍開府祭酒冀州別駕

隋剡丞

洛州司法參軍

康仁

輔元

字康仁洛州
司戶參軍事

相武后

僞周水衡監丞王貞墓誌跋

誌稱貞祖順齊殿中侍御史雪山府別將父義隨鄜州司馬案新唐書兵志載府兵之制起自西魏後周而備於隋唐興因之又文獻通考稱周太祖輔西魏時用蘇綽言始倣周典置六軍籍六等之民擇魁健材力之士以爲之首盡蠲租調而刺史以農隙教之合爲百府每府郎將主之分屬二十四軍開府各領一軍大將軍凡十二人每一將軍統二開府一柱國主二大將軍復加持節都督以統焉凡柱國六員衆不滿五萬人述其制甚詳又曰隋兵兵乃仍周齊府兵之舊而加潤色是兵府始于西魏後周而齊亦有之今隋之兵府尙有可考齊兵府名之見于石者謹此誌之雪山

府其兵制則史闕文矣誌稱貞撰韻苑十卷成文章之管轄啓人
才之戶牖新舊兩志均不著錄殆顏魯公韻海鏡源之類也誌稱
貞以天壽二年八月廿七日與夫人安定梁氏合葬于洛州邙山
之麓而誌末則書長壽是天爲長之譌此誌文旣綿麗可喜書亦
精雅而書年號文字之譌如此察書者可謂疏矣

泉獻誠墓誌跋

獻誠之父男生墓誌前數歲出洛陽此誌今年繼出以新舊唐書
高麗傳及新史蕃將傳考之間有異同新史高麗傳言蓋蘇文或
號蓋金誌稱祖蓋金泉男生誌亦作父蓋金與新史合兩傳均不
載蓋蘇文祖父名男生誌作曾祖子游祖太祚此誌亦云曾祖大
祚與泉生誌合兩傳稱蓋蘇文自稱莫離支蓋蘇文死男生襲而
男生誌及此誌則作蓋金任太大對盧泉生任太大莫離支舊史

高麗傳及新史蕃將傳並稱男生卒贈并州大都督泉生誌作贈使持節大都督并汾箕嵐四州諸軍事并州刺史此誌作并益二州大都督舊史不載男生贈諡新史作諡曰襄與此誌及男生誌均合至獻誠歷官兩史所載不免疏略新史蕃將傳載男生內附遣獻誠訴諸朝高宗拜獻誠右武衛將軍賜乘輿馬瑞錦寶刀高麗傳稱高麗平以獻誠爲司農卿誌稱尋授襄公命詣京師謝恩天子待之以殊禮拜右武衛將軍賜紫袍金帶並御馬二匹與傳略合惟誌稱拜衛尉正卿不作司農卿又蕃將傳稱天授中以右衛大將軍兼羽林衛舊史高麗傳作授右衛大將軍兼令羽林衛上下誌則作光宅元年十月制授雲麾將軍守右衛大將軍其月廿九日勅令右羽林衛上下天授元年九月制授左衛大將軍蕃將傳誤併光宅元年守右衛大將軍天授元年授左衛大將軍爲

一事舊史不誤惟右羽林衛失右字耳至誌稱獻誠於調露元年
充定襄討叛大使既還錄功授上柱國開耀二年襲封下國公食
邑三千戶垂拱二年三年奉勅充神武軍大總管四年九月充龍
水道大總管討豫州反叛天授二年充檢校天樞子來使則兩史
均失書賴誌知之也史稱獻誠因來俊臣求貨不得誣以謀反縊
殺則天後知其冤贈右羽林衛大將軍與誌正合惟史不載被誣
縊殺及昭雪贈官之年誌則載獻誠之死在天授二年昭雪在久
視元年上距其死且十年矣史不載獻誠子據誌則長子玄隱於
獻誠昭雪時以武騎尉柳城縣男進游擊將軍行右玉鈴右司階
員外置同正員次玄逸玄靜又可補史闕文者也誌爲朝議大夫
行文昌膳部員外郎護軍梁惟忠撰文筆頗馴雅而全唐文無其
人又可據以補唐文逸篇矣丙寅十月

并州孟縣令崔哲墓誌跋

誌稱哲字能仁魏司空林十一代孫曾祖彥穆周金紫光祿大夫
聘齊陳二國大使金安襄三州刺史千乘公祖君肅隋黃門侍郎
秦王府長史使持節襄州諸軍事襄州刺史贈鴻臚卿父思約祠
部郎中璧復和三州刺史哲解褐滁州司法參軍稍遷衛州司倉
參軍事又除左武威衛倉曹參軍尋加朝散大夫制除宜州司法
尋除并州司倉參軍又改并州孟縣令以久視元年七月卒嗣子
定王府參軍均潞州司士志廉等案唐書宰相世系表載彥穆周
小司徒東郡公孫君肅隋黃門侍郎君肅生思約和州刺史思約
生哲巴令哲生均丹州刺史志廉右庶子誤以君肅爲彥穆孫其
官爵亦與誌不合哲終孟令表乃誤作巴令均當據誌正之文爲
天官郎中申屠場撰文字均勝或亦場所書耶

并州孟縣令崔君夫人源氏墓誌跋

此誌之秀容郡君源氏卽崔哲之配曾祖文宗隋大理卿祖師隋
尚書左丞父直心司刑太常伯左丞唐書宰相世系表作源彪字
文宗隋莒州刺史臨潁縣公生師民隋刑部侍郎師民生崑玉惠
誠心案北齊書有源彪傳稱彪字文宗隋書有源師傳作父文宗
此誌亦作文宗殆以字行者師民殆避太宗諱省民字猶王世充
之作王充李世勤之作李勤矣唐表之惠當爲直心二字之譌觀
其弟作誠心可知且源乾曜傳亦作父直心與誌正合也夫人五
子哲誌僅載長子均次子志廉此誌則尙有同州司倉忱安府兵
曹惲寧陵令志誠世系表則均與志廉之外尙有廣而無忱與惲
及志誠並當據誌補之誌爲張九齡撰姚文簡書不知此文曾見
曲江集否異日當一檢之

泉岬墓誌跋

岬爲泉獻誠之孫與其祖誌同時出土兩唐書於獻誠事迹歷官記載疏略予旣據獻誠誌一一爲之訂補此誌稱祖左衛大將軍下國莊公獻誠父光祿大夫衛尉卿下國公隱獻誠誌載久視元年昭雪制不云予謚載其長子名玄隱爵柳城男此誌隱爵下國公則獻誠之贈謚隱之襲爵皆在獻誠葬後足補彼誌之闕至彼誌稱玄隱此誌作隱豈一爲名一爲字耶抑後來改玄隱爲隱不可知矣誌稱岬字孟堅年甫二歲封淄川縣男尋進封淄川子邑四百戶又授驍騎尉以蔭補太廟齋郎屬有事后土授宣德郎以開元十七年九月終春秋二十有二誌爲其父隱所撰而銘文乃云梁木其壞兮太山其頽兮哲人一去兮不復再父之諛子乃不倫至是亦可異也兩史于泉生以降但載獻誠玄隱以後均不載

不有此誌且無可考矣聞隱墓誌亦出土苦墨本不可見書此俟之

行滎陽郡長史崔湛墓誌跋

湛字湛然雞澤縣令玄覽曾孫滑州司馬志道之孫涿城府果毅祥業之子唐書宰相世系表載元覽曾孫湛鄭州刺史失書志道與祥業湛官至滎陽郡長史亦非鄭州刺史也誌稱湛長子虔次子朝季子幹表乃作虔朝粲疑亦表誤也誌爲起居舍人翰林院待制閻伯璵撰伯璵仕至袁州刺史開天間以文學知名唐誌中至佳者也

司勳郎中吉渾墓誌跋

渾爲武氏相頊之子兩唐書頊傳均不載其名惟宰相世系表有之表稱渾官司勳郎中與誌合吉頊舊史載之酷吏歐公以其有

抑武興唐之功特拔出之歐史之所以賢於舊史此亦其一矣誌載渾之先世及後嗣頗詳宰相表則至略茲據誌所載別爲之譜此誌有兩側一記渾卒葬年月一記書撰人名及渾諸子諸弟名位他誌所未見也兩史稱頊爲洛州河南人誌作馮翊人殆舉其舊望與

馮翊吉氏系譜

謙

驃騎大將軍襄州刺史

哲

忠統易三州刺史

頊

吏部侍郎同中書門下平章事贈御史大夫

渾

字玄成

尚書司勳郎中

遵

遐

遠

濬

河南澠池縣令

深

不齊地誌且雖同卷矣明國書卷之六

卷之六

卷之六

卷之六

卷之六

琚

鄂令

溫

武禮二部侍郎

太子右贊善大夫崔孝昌墓誌跋

誌稱孝昌字慶之清河東武城人曾祖樞祖義直父知溫考兩史並有知溫傳並稱為許州陽陵人誌作清河東武城者舉舊望也舊史載知溫父誤作義真新史宰相世系表作義直與誌合誌載知溫官皇朝英府司馬兼尚書右丞黃門侍郎同中書門下三品監修國史中書令贈使持節荊州大都督諡曰良兩傳均誤尚書右丞作左丞新史又誤荊州大都督為幽州舊史不誤諡曰良誤作諡曰忠兩傳並載知溫子泰之開元時為工部尚書少子諤之為將作少匠預誅二張功封博陵縣侯而不及孝昌宰相世系表亦但箸泰之諤之亦無孝昌名誌又稱神龍初公兄以叶贊經綸為姦臣

所忌轉徙邊郡公亦隨貶衢州長史所謂公兄不知卽泰之否其事不見於知溫傳無可考矣此誌文字均佳命潢匠裝治成冊付長孫繼祖學書漫書其後

清河郡公崔泰之墓誌跋

此誌中書侍郎崔沔文李迪隸書近出洛陽誌稱泰之字泰之曾祖世樞皇朝上大將軍散騎常侍司農卿武成侯祖義直紀越二王長史陝州刺史嗣武城侯父知溫中書令舊唐書崔知溫傳祖樞司農卿父義真陝州刺史世樞作樞殆避太宗諱省義直誤作義真新史宰相表作義直固不誤泰之之名兩史雖附見知溫傳然但云泰之開元中官工部尙書不及其他惟世系表言其初以職方郎中豫平二張據誌則稱于時外戚干政內嬖握權將假中闡圖危冢嗣公以家承漢相深東郡之憂謀協陸生讚北軍之舉

乃與羽林將軍桓彥範等共圖匡復中興之際公有力焉與表合而言較詳兩史但稱秦之弟諤之與誅二張功封博陵縣侯而不及秦之世系表又稱諤之初以商州司馬豫平韋后功第二又稱其爵爲趙國公與兩傳亦異而秦之大節則僅賴此誌以彰之不得不咎兩史之疏矣誌於秦之歷官述之甚詳稱年十有二遊昭文館對策高第明年調補雍州參軍事丁中令府君憂服闋授太子通事舍人轉左金吾衛長史司賓丞太子司議郎加朝散大夫上柱國除右史遷職方郎中以匡復功拜太僕少卿封安平縣開國男衛王長史武三思竊弄國柄出公爲洛州刺史復以三思憎忌轉德州刺史換梓州刺史左遷開州刺史降爲資州司馬今天子克掃陰沴起爲濟州刺史未到官旋拜國子司業光祿少卿判左屯衛將軍事遷禮部侍郎加銀青光祿大夫遷尚書左丞遷黃

門侍郎北狄不賓詔公持節按撫丁內憂服闋驛召拜戶部尚書
進封清河郡公又轉工部尚書年五十有七以開元十一年薨有
制追贈荊州大都督足補兩史之闕而年十二射策高第十三補
雍州參軍其早達亦罕見矣誌載子祕書郎承禮世系表不載但
書孫備亦當據以補表文之佚撰文之崔沔爲宰相祐甫之父亦
元宗朝名臣唐書有傳

祕書監盧虔神道碑跋

此碑歸登奉勅撰鄭餘慶奉勅書宋以來諸家皆未著錄據碑稱
虔葬於絳州近人所撰山右石刻叢編亦不之及此百餘年前舊
拓爲松江沈韻初舍人所藏殆海內之孤本矣虔爲成德節度從
史之父從史兩書均有傳舊書稱從史父虔少孤好學舉進士歷
御史府三院刑部郎中江汝二州刺史祕書監敘述至簡碑稱虔

字子野大王父齊指高道不仕王父神友左金吾衛兵

殆游曹參

字三父名已泐虔少讀書姑射山永泰初舉進士高第解褐

襄陵縣尉尋補陝州主簿河南尹鄭叔則表爲王屋縣尉仍

辟留守從事俄遷監察御史拜殿中侍御史遷侍御史知雜事尋

除復州刺史改江州刺史歲課第一就加朝散大夫尋除刑部郎

中除大府少卿州刺史充本州防禦使兼東都畿汝州都防

禦副使輕車都尉賜紫金魚袋就加左散騎常侍兼御史中丞元

和元年拜左散騎常侍加朝請朝議大夫又加正議大夫上柱國

封范陽縣國侯食邑一千戶仍銀青光祿大夫三年十月遷檢

校工部尚書兼祕書監以四年三月卒年七十有六後月八日

詔贈兵部尚書其年秋八月十一日遷神于絳州龍門縣又稱虔

研究書傳尤精易道又曰公深於易春秋孝經常以經義決獄莫

不稱善又稱其刺復州時修長堤灌田數千頃民免水害改刺江
州時拒廉使重歛蓋良吏也使非其子爲節鎮則事蹟不可知矣
碑文多漫漶末行建碑年月但存三月辛丑朔廿□□□卯建諸
字考長術元和五年三月爲辛丑朔廿七日得丁卯碑蓋立于虔
卒後逾年舊史憲宗紀稱從史以元和五年四月戊戌貶驩州司
馬四月爲庚午朔戊戌爲二十九日上距立碑時則才匝月耳而
榮辱相判如此碑稱從史官冠軍大將軍左金吾衛大將軍員外
置同正員充昭義軍節度管內支度營田潞磁邢洛等州觀察處
置等使奉天定難功臣檢校尚書右僕射兼潞州大都督府長史
御史大夫上柱國范陽郡王傳多失書亦藉此碑知之矣

范陽盧夫人墓誌跋

夫人適起居郎李璋爲憲宗朝賢相李絳之子兩書附見絳傳誌

稱絳贈太傅而兩史並作贈司徒舊史不載絳諡新史作諡曰貞
與誌同此誌爲璋所撰結銜作朝議郎行起居郎舊史稱璋登進
士第盧鈞鎮太原辟爲從事大中末入朝爲監察轉御史出刺兩
郡宣歙觀察使而不載其任起居郎新史作大中初擢進士第辟
盧鈞太原幕府遷監察御史進起居郎咸通中累官尙書右丞湖
南宣歙觀察使較舊史爲詳此誌刻於咸通三年尙稱行起居郎
知觀察兩郡在咸通三年以後矣宰相世系表稱璋五子曰讜兒
曰慎微曰德鄰曰少微曰德休誌作六子長道扶次陞次小字閔
九次小閔次夏兒次烏八後四子爲小名故與表不合而長次兩
子亦與表不同不可曉也璋曾舉進士第而文拙累殊甚唐中葉
以後文學日靡韓文公文起八代之衰所以見推於後世與

汀州刺史孫瑄墓誌跋

此誌李都撰李涪書文字均勝爲晚唐佳刻兩唐書均有孫逖傳
官至刑部侍郎爲瑄之曾伯祖而不及瑄誌稱瑄曾王父適關內
營田判官左羽林兵曹參軍京畿採訪支使贈左散騎常侍王父
會侍御史郴溫廬宣常五州刺史晉陽縣開國男贈工部尙書烈
考公又大理卿禮部尙書致仕贈太尉新唐書宰相世系表載適
官左羽林兵曹參軍與誌合會常州刺史晉安縣男據誌晉安乃
晉陽之譌公又睦州刺史不作禮部尙書瑄鳳翔少尹據誌則瑄
官至御史中丞出爲汀州刺史未嘗爲鳳翔少尹也誌稱子男二
人長曰杲爲廣南推官得試校書次曰三合幼而未弁表則瑄子
二人曰揆刑部侍郎曰拙中書舍人不知卽杲與三合否也誌又
稱襄葬事者季弟前京兆府高陵縣尉瑄表乃失其名當據誌補
之書人李涪官朝散大夫守河南縣令不知與昭宗時官國子祭

酒而撰刊誤之李涪爲一人否瑄夫人隴西郡君李氏此誌蓋之
陰刻夫人弟李就撰附誌以記夫人懿行他誌所罕見亦金石刻
辭中剏例也

高麗大覺國師碑跋

此碑海東金石苑箸錄燕庭先生跋云大覺名煦字義天避宋哲
宗諱以字行高麗文宗仁睿太后所生性聰慧嗜學出家居靈通
寺號祐世僧統曾入宋求法神宗命楊傑伴行至杭州復歸本國
居總持寺宣和七年卒贈大覺國師高麗史有傳案燕庭先生所
敘大覺事實本鄭麟趾高麗史宗室傳惟傳但言煦病王幸總持
寺問疾尋卒不云卒於宣和七年碑辛巳秋八月遘疾冬十月五
日壬辰右脇而化考辛巳爲建中靖國元年當高麗肅宗之六年
非宣和七年也惟碑首稱上嗣位之四年乙巳秋八月庚午大覺

國師門人都僧統澄儼等具師之行事以聞云云乙巳爲高麗仁宗之三年正當宣和七年以上距大覺之卒已二十餘年此乃建碑之歲方伯殆誤以是爲大覺卒年耳頃檢閱篋中高麗諸碑爰書紙尾以訂正之

元劉秉謙雙勾竹立幀跋

此幀絹本下畫巨石左右大小竹各三本笋三長者幾二尺小者於石旁露微梢而已竹葉繁密交錯無一筆稍紊古健精妙款署至正乙未壽陽劉秉謙爲克明憲掾作下鈐三印曰秉謙曰劉氏子益曰雪看考諸家書畫譜錄皆不載秉謙名元代以雙勾竹名世者爲張溪雲遜往歲於溷陽端忠敏公許見溪雲長卷視此且遠遜乃溪雲擅盛名而秉謙轉無聞於世予故特表章之嗚呼世之抱高行絕詣而不見重於當時沒無稱於後世者多矣顧

僅一劉君而已哉

元孫獻畫鵝立幀跋

此幀絹本款署至正甲子夏月上谷孫獻畫下鈐二印曰孫獻之印曰穢林畫鵝二一白一褐工妙生動得五代宋人衣鉢張之素壁如聞鵝聲也畫史彙傳據圖繪寶鑑續纂及詠歸亭詩鈔載孫獻字都林雄縣人山水得郭熙三昧人物追李唐馬遠花鳥蟲蝶莫不酷肖列入國朝而此幀款書似絕非後人僞託固明明署至正年號惟至正無甲子至洪武十七年乃值甲子豈獻爲元世遺民洪武之世仍書至正歟抑子字爲誤書歟又據此幀印文知獻字穢林彙傳作都林都殆郁之誤字惟彼稱獻雄縣人此幀署上谷古之上谷爲今懷來而雄縣則屬保定亦殊不合平生所見獻畫僅此安得更見獻他畫而一證此疑耶

謝樗仙憩石酌泉圖卷跋

樗翁好作大幀筆力雄厚而無獷野之習此卷蒼潤秀挺與他作迥判款署吳門謝時臣製雖不署年月然可決爲晚年之筆當是七十歲外所作吳荷屋中丞歷代名人年譜謂樗仙以嘉靖二十六年丁未卒年六十不知何據予舊藏樗翁萬山飛雪長卷鈐七十四翁印東友上野氏藏練溪佳勝圖署庚申八月年七十四翁謝時臣寫是樗翁嘉靖三十九年尙存年七十四則丁未乃年六十一予別藏樗翁立幀題丙午秋月六十翁謝時臣寫則丁未確爲六十一有此數證吳氏之誤審矣至樗翁卒於何年苦無記載附記此卷之後俟異日考焉

林佳清水仙竹石立幀跋

佳清之名不見書畫家箸錄此幀絹本中爲山石石上羅列水仙

師趙彝齋石傍箸勾勒竹數竿清秀超逸款篆書二行曰癸未立
秋日爲我思老先生製林佳清下鈐佳清二字小印上方有陳老
蓮題字五行文曰張員外云筆墨兼到者夷間是也兒雲林云有
法去無法之間所稱神品者夷間是也老蓮騎驢三十年筆塚纍
纍那得夢見今老矣書以識恨洪綬案林與老蓮往還自是當時
高手畫品亦與老蓮抗行乃老蓮名滿當世佳清泯沒無間一技
之傳亦有幸有不幸矣

普荷上人畫跋

明季高僧善畫者以上人畫蹟爲最難遇予求之垂四十年始得
一卷一軸此幀絹本蓋用米法而變者超雋有奇氣上端有大滌
子跋謂老人昔爲鍛工出家者初不識字淨悟生慧無多弄墨云
云考張瓜田畫徵續錄謂上人俗姓唐名泰字大來年十三補邑

諸生天啓中以明經入對大廷甲申後薙髮爲僧結茅雞鳴山下
與大滌子所言不合豈國變後混迹爲鍛工爲僧後託言不識字
以避世網耶明季士夫多高節奇行吾不得而測之矣

姜巢雲花卉册跋

此册僅存四葉一賦色山茶二賦色水仙三水墨芙蓉四賦色碧
桃款曰辛酉仲春畫於墨琴堂西冷姜泓曰巢雲姜泓印章曰在
湄畫筆清麗超雋與宋五代人血戰當與陳老蓮雁行每葉有南
田題字推崇甚至圖繪寶鑑續纂載姜法字在湄杭州人花卉靈
異出諸天生措語至簡既不記其當何時代亦不載其字雲巢考
辛酉爲康熙二十年故與南田同時其畫迹流傳至少四十年來
僅見此四葉而已平生收集書畫最喜藝高而名不爲世所知者
蓋表微闡幽固吾輩之責也丙寅除夕

劉塞翁畫跋

劉塞翁畫傳世甚少此紙本直幅繪枯木竹石燕六翎集其間畫品在白陽易庵之間而雋勁有生氣款署塞翁二字艸書似明人下鈐劉泌如字鄴侯號塞翁九字印塞翁附見畫徵續錄朱雲燎傳中云潛江人工翎毛有生氣寥寥數言而不知其名字今觀其筆墨殆明季隱君子故僅署別號使非此幀在人間其名字且終翳如矣予故特表章之

素庵相國七十壽序

達天德盡人倫之謂道明乎此之謂知體乎此之謂仁行乎此之謂勇履乎亨則行所學際乎屯則貞所守嘗持此衡古之人百年不一覲也遑論今之世乃得之我素庵升公公少讀書西山卽以斯道爲己任三十通朝籍三十八爲外吏四十四而開府又四年

領兼圻可謂亨矣而所至有政績方光緒己亥任陝西糧道歲羨四萬金不入己奉 旨有公爾忘私之褒庚子拳匪之變任山西按察使率陝軍冒暑兼程以赴 闕未達而天津陷復紆道奔行在從事捍衛辛丑撫陝歲洊飢轉江鄂之粟以活關中之民癸卯 車駕返京師值 孝欽顯皇后七旬聖壽慶親王通電各省令捐金慶祝公抗疏止之乙巳總督陝甘因左文襄公織呢局已廢而復新之興毛褐之利以利民改茶布稅法歲倍入以利國蘭州濱黃河西關舊有鐵索聯方舟以濟夏漲則停濟或兼旬嚴冬洩寒則履冰以渡冰將泮崩陷致溺者歲恆有之公憫焉乃架鐵梁以利行人關隴回漢雜處相水火屢構豐公御以大公漢回胥悅此犖犖數大端可謂能行所學矣我 朝自英人以兵力要互市外侮頻仍逮光緒中葉法越日韓兩役兵威再挫譌言繁興遂

釀成戊戌之變法丙午定期立憲遂助成辛亥之革命近二十年間可謂屯矣公當戊戌方以道員權釐於白河聞之憂甚以爲國之弱敝在人不在法必變法且危及國本懷疏草入都欲求代奏適八月政變而止乃己庚以後邪說益滋世變益亟柄政者苟且補苴以爲立憲或可緩革命之禍乃通電徵各疆臣意見公力陳其害而卒不可挽自是以籌備憲政法制日更天下騷然權奸復隱操國柄公灼知其危以宣統元年復疏陳新政之害謂非罷憲政不能延國命且以去就爭得 旨許開缺時貧不能歸乃墾渭濱官荒以自給及辛亥秋武昌變作九月朔西安應之公聞訊徒步走涇陽間道入平涼發電致蘭州轉達樞府十月奉 命署理陝西巡撫督辦軍務乃亟徵舊部卽日誓師大小數十戰先後克長武永壽邠州醴泉咸陽均身先士卒躬犯礮火壬子三月方攻

乾州而遜位詔達行間諸將請解甲公憤甚欲仰藥以殉諸將及幕僚環請待後圖公不得已明年乃居西甯以待時而袁世凱命趙惟熙卑禮厚幣致聘問公嚴拒之知不可留乃託辭游番中諸寺十一月從番佛嘉木養貸行帳駝糧日行萬山中歲暮至阿拉善駝瘠帳敝乃留度歲正月別假行帳駝糧往庫倫不識道迹駝馬糞以行朔風裂肌或終日不得食夕張行帳親拾駝馬糞以爨自西甯至庫倫凡百有一日以癸丑三月抵庫倫值賓圖王海山公與謀大計草討袁世凱檄聲其罪以號召忠義檄既四布袁世凱見之乃名捕公且屯兵塞上邀之已而庫倫內變起乃謀渡日本先取道恰克圖至烏金斯克展轉易西比利亞南滿車往大連方發庫倫有人求附行至恰克圖有俄警吏止公行拘同行人去次日一番僧偕一人攜護照來言昨同行者乃將不利於從者

故番僧呼警吏拘之此去無阻矣番僧與公固不相識其忠義感
人如此既達大連易舟至東京東人遇公有加禮商人某以別墅
館之乃久無所遇返厲青島丁巳復辟奉命拜大學士未幾
變作道阻不得赴是冬復西度隴戊午冬北至長春歸而疾作亘
數歲不愈甲子秋猶力疾再入隴取道綏遠遇故將某力阻之乃
臨河而返逮十月值宮門奇變公憤痛甚既奔問行在歸而
疾加甚及車駕幸天津猶上疏以憂勤惕勵爲請每日必扶掖
至行在蓋十餘年鞠躬盡瘁未嘗一日敢自安也可謂貞所守
矣綜計公之平生智能燭先幾勇能決大疑仁以爲己任馳驅冰
雪之域奔走焦爛之餘不以存敗利鈍挫其志雖古賢哲何以加
茲今年丁卯孟春八日公年登七十振玉以乙卯歲始識公于海
東不以振玉爲不肖折節下交自信知公深爰序公大節以爲當

世楷模百世而後必且有聞公之風而頑廉懦立若夫期頤百年之壽仁者所必有不足為公祝也

陸軍部協參領顧君傳

君諱臧字君用先世為吳興望族曾祖某以武職官粵東遂家焉

始隸籍番禺父某生丈夫子五君其季也幼敦內行家貧力學番

禺梁文忠公鼎芬君中表昆弟也講學廣雅書院君從之游及文忠

掌教兩湖書院君亦偕往所學恆兼人年二十五丁內艱既服闋

文忠勸君納粟為門戶計娶婦謀嗣續君慨然曰時方向亂丈夫

當執干戈為國僇力安用家為乃投筆留學日本士官學校卒業

後入日本陸軍聯隊充見習士官補陸軍少尉既歸國授陸軍部

協參領鄂督張文襄公之洞粵督陶勤肅公模先後延攬君以留學

之資出於鄂而粵則桑梓也義均不可辭乃在鄂充學堂教員數

歲而後至粵則勤肅已薨於位適川督某公訪人才於文襄乃以君應入蜀任軍警督練並勦設武備學堂未幾錫公良督川同列有譖君者文襄亟電君返鄂渚復薦君於東三省總督某公某公頗負時譽以東三省地廣政繁求才足幹濟者諮於文襄故文襄以君往某公令總辦巡警局主講武堂及督練公所事無不舉某公亦雅相引重於時袁世凱爲北洋大臣其長子克定陰爲收攬人才聞君能乞某公爲介欲見君君逆知袁爲人必不克終臣節謝不允某不能強乃置酒觴君與克定隱爲作合君佯不知既就坐乃舉酒歷數袁不臣狀某與克定均大駭酒散則君已留書去遼矣梁文忠公在鄂聞而壯之亟迎君返且謂曰君以身許國遂可忘嗣續乎乃勸君娶於胡未幾端忠敏公方督兩江欽君風節延君佐理時蘇紳因同治初山陽丁廣文顯曾勦導淮入海涸洪

澤爲田之說以干曾文正公國藩文正不許至是乃欲借以興大役
便私圖力請於江督邀以必許且請先設導淮測量局忠敏以委
君君既履勘淮流知其必不可乃上萬言書駁之大意謂水利者
兼蓄泄之謂也洪澤所以儲水備旱使墾爲田異日既失容水之
地潦年必平陸汎濫旱歲則涓滴不存所謂興利除害者安在因
謝局事而監陸軍小學未幾學堂總辦以侵蝕公款懼君伉直發
其隱擠君去忠敏復令管鎮江象山礮臺在職五年嚴約束正軍
紀部下無不法者軍民交便君至是宜可稍展素蓄矣乃辛亥七
月君偵革命軍將發難卽嚴守礮臺昕夜不懈逮八月二十日果
聞鄂變急將寡嫂猶子送申江姊家矢以死報國紉紅綾爲帶繫
衽衣中書大清帝國鎮江象山總礮臺官番禺顧臧之屍以京口
爲江甯門戶兵力弱電江督乞援軍張安圃制軍人駿遣陳某密率

兵赴援陳至君家詢鎮江安否時君方守臺家人不知爲援師也漫應之曰安陳據以電江督適無錫亦請援陳乃移軍往於是君之力乃益孤矣然猶以大義諭守兵矢死不渝八月二十四日有匪類自稱革命軍勸君同舉事且謂將推君爲都督其以密函請者日數十君一一焚拒之告商會學會等有敢附和革命者開礮擊之人心稍安及九月十六日革黨知君不可利動乃隱結防營及夙受君知遇之門人日晡乘君不備遽解君衛士械羈君昇至鎮江道署所謂軍政府者環跪請君任軍事君裂眦大罵以死拒門人不忍加害乃禁閉室中日餽酒饌君拒不納水漿不入口者五日門人知君終不屈乃請主商會者送君歸寓舍君以大事猶可爲姑忍死斥衣物製裝走上海有所謀及遜位詔下猶至奉天以大義責主帥不爲動然尙連年奔走青島京津間而卒不得

一當及甲子冬猝遭 宮廷之變時君方在奉天亟奔赴 行在
至是君之死志乃益決矣再越歲卒以憤死君平生律已嚴一介
不取而好施濟管象山礮臺時月俸三百金以十之二贍寡嫂及
遺孤所餘以分士卒及學生之貧者俸入之日隨手輒盡君之去
鎮江也商會餽萬金嚴拒之廣東會館董事梁某釀同鄉金三千
贈之亦峻謝翌年鎮江礮臺士卒聞君旅食且絕復釀千金不敢
逕致君請於君之姊以進亦揮之去方至滬江寓一樓不眠不語
家人初尙以肉進君曰我不能死事姑有待耳負咎之身尙肉食
哉已而饗殮且絕家人以請君曰買一錢鹽和湯飲之不亦可乎
適其舅在京餽二百金始得具饘粥友人或以貧告尙分金濟之
後卒不能自存乃依婦翁胡君於天津竟死婦家方君旣懷必死
之志乃日夕縱酒嚴冬衣不完出不車或有所餽非其人甯忍飢

謝之如是年餘遂致疾既劇夫人胡氏禱於神願以身代隱刲股
肉療之君謝不入口胡淑人有懿行明大義初君曾病甚刲股肉
飲之而愈已而母病再刲股得痊至是而三矣卒不能拯君於死
其命也夫君死之日赫然瞑臥無以治斂具淑人號於諸同志得
醵金襄大事無子立兄子祖杰爲嗣嗚呼君固不媿烈丈夫若淑
人者亦可厲薄俗矣君生於同治辛未九月卒於宣統丙寅五月
得年五十有六君既殯君之友商太史衍瀛懼君大節不彰乃述
君遺行爲事略予乃據以爲之傳俾後之君子知君雖死于牖下
固與馬革裹尸等也

丙寅彙

丙寅案

國典風革寒只等出

昔世百益車湖平以觀以益之爵新益之釋于以善觀派于翻不
抄平正十百六皆觀無益之文商太史治蘇對卷大商不所以致
人皆亦四淵藪谷矣其求效同前幸未武日卒氣宣臨丙寅正民
期金與大集無于立只于顯亦為圖觀判其固不觀隱去夫其求
其命也夫皆派之自觀然則想派以自煥且其人謂效福同志掛
為之而愈自而母派再隨想為至景而三矣卒不歸歸作派派
因熱之皆德不人口貼謂大育結百則大進而會派皆其德因
撫之賦景平銷發發效謂國夫大附九蘇效謂國長身外則賦則

松翁著書目

殷虛書契前編八卷後編二卷

殷虛書契考釋三卷

殷虛書契待問編一卷

殷虛書契菁華一卷

殷虛古器物圖錄一卷

殷商貞卜文字攷一卷

集殷虛文字楹帖一卷

流沙墜簡考釋二卷

高昌壁畫菁華一卷

敦煌零拾一卷

石室碎金一卷

補宋書宗室世系表一卷

魏書宗室傳注十二卷表一卷

高昌麴氏系譜一卷

瓜沙曹氏系譜一卷

唐折衝府考補一卷補遺一卷

徐俟齋年譜一卷附錄二卷

萬年少年譜一卷附錄一卷

雲窗漫槩一卷

雪堂校刊羣書敘錄二卷

雪堂金石文字跋尾四卷

雪堂書畫跋尾一卷

松翁近藁一卷

丙寅藁一卷

碑別字補五卷

璽印姓氏徵二卷

五十日夢痕錄一卷

陸機毛詩草木蟲魚疏新校正二卷

五史斟議五卷

三國志證聞校記一卷

道德經考異一卷附補遺

南華真經殘卷校記一卷

抱朴子殘卷校記一卷

劉子殘卷校記一卷

皇甫士安高士傳輯本一卷

帝範校記一卷

臣軌校記一卷

貞觀政要校記一卷佚文一卷

元和姓纂校記二卷佚文一卷

王無功集補二卷校記一卷

王子安集佚文一卷校記一卷

臨川集拾遺一卷

鶴湖先生遺詩輯存一卷

隰西草堂集拾遺一卷

金石萃編校記一卷

宋元釋藏刊本考一卷

續彙刻書目十卷閏一卷

殷文存二卷

秦金石刻辭三卷

夢鄞艸堂吉金圖三卷續一卷

金泥石屑二卷

古器物範圖錄四卷

古鏡圖錄三卷

古明器圖錄四卷

秦漢瓦當文字四卷

赫連泉館古印存一卷續存一卷

擬清室古官印集存一卷

隋唐以來古官印集存一卷

貞松堂唐宋以來古官印集存一卷

西夏印譜一卷

齊魯封泥集存一卷

歷代符牌錄二卷

四朝鈔幣圖錄一卷

雪堂藏古器物圖錄一卷

兩浙佚金佚石集存一卷

昭陵碑錄三卷附錄一卷補一卷

唐三家碑錄一卷

西陲石刻錄一卷後錄一卷

淮陰金石僅存目錄一卷附錄一卷

京畿冢墓遺文三卷

芒洛冢墓遺文二十二卷

初編三卷補遺一卷續編三卷續補一卷
三編一卷四編六卷補一卷五編六卷

東都冢墓遺文一卷

中州冢墓遺文一卷補一卷

鄴下冢墓遺文二卷二編一卷補一卷

關中冢墓遺文四卷補一卷

山左冢墓遺文一卷補一卷

山右冢墓遺文二卷補一卷

兩浙冢墓遺文一卷

吳中冢墓遺文一卷

廣陵冢墓遺文一卷附錄一卷

襄陽冢墓遺文一卷

石屋洞題名一卷

龍泓洞題名一卷

地卷徵存一卷

蒿里遺珍一卷

恆農專錄一卷

專誌徵存一卷續一卷

楚州城專錄一卷

石鼓文考釋七卷

天發神讖碑補考一卷

蒿里遺文目錄十一卷補一卷

三韓冢墓遺文目錄一卷

雪堂藏古器物目一卷

雪堂所藏金石文字墨本簿錄一卷

重訂漢石存目二卷

重訂魏晉石存目一卷

海外吉金錄一卷

海外貞珉錄一卷

重訂紀元編三卷

庚子褒恤錄校補二卷

都百種二百四十一卷